

Pablotenipa Corintodenidsa ima teppe tahidecca dosse quinajaro

1 Corintios

Corintopi dsama Acaiacca odsa panani imeni. Passo imeni huajira tanidsa odsa panani tojajaro. Nadsapa dsama onihi, onihicca madija nahihuaji qquide jajahi toja najari. Nanidsa naqui canoa imeni huapi tani huana huana totoquina najaro. Todsepetaji huemani naqui eheccajonamana najaro. Corintocca madijapa dsepedeni ssequiri najari. Madija huapi taha naco huananehe tohuira disseraqqiri najari. Dio pajissacca ssamoqqiri nahi. Pohuadeni cacahuade pohuamaccadsa disseraqqiri najari.

Pablopa nahihuaji toccadsa Jesocristo tahimari icassiejeranijinecca mari icanabaqqipojari. Huajano pamaha nahidsa madijari. Nadsapa Corintocca madija motapa Jesodsa jehe quinajari. Poccadeni quequeriqqui cajimanajari.

Dsotodepa Pablo dsama onihihuaji toccajari. Nahihuaji madidsa ajijaro ima teppe Corintodenidsa dosse inanijaro. Tahidepa Corintocca madija Jesodsa toquejenarideni poccadeni ima teppe Pablosa dsodo quinapojaro. Nadsapa poccadeni dsodoniji ecomeranijine Pablo pohuadenidsa dsodo inajaro. Poccadeni ima bica tejerani quinahi mittadsa naco poccadeni ima icattemanijine dsodo inajaro.

Pablo, Sostene tedseje nija quinajari

1 ¹ Ohuemecotedeni, ohuapi Pablo tiadenidsa dsodo onajaro. Dio jipa tadsa Jesocristocca dodosse ojanijine ohuadsa huahua najaride. Ohueme-cote Sostene tedseje tiadenidsa nija inajaro. ² Odsa panani Corintohuajicca Diodsa tiquejenajaro titiqueriqqui nanihuaji tiadenidsa ajijaro ima dosse inajaro. Huapima Jesocristodsa pajissa tiquinadsapi pohuajine tibodideni tohuiridsajaro. Najarojine Dio-cca tiquejenaropaji. Dio tiadenidsa

huahua najaripa: – Ohuadsara tibodideni huatoni ojari naji – najari. Dsama huapimadsa madiridsamanajari Jesocristodsa pajissa quinajaridenidsa naco: – Ohuadsara tibodideni huatoni ojari naji – nanaja najari. Jesocristopa pohuadeni Medsede. Najari ojarihi ia Medsede. ³ Abi Dio, Pohua Bedi ia Medsede Jesocristo tedseje tiadenidsa ima bicani inanamanana. Poccadeni jonehe naqui tiadenidsa tojana, inajaro.

Ima bicanipi Cristojine

⁴ Ohuemecotedeni, titohuideni Diodsa huati huati onadsapi: – Jehe

Abi Dio, *epejени. Tijine bica tani –ohonanajaro. Jesocristocca tiquejenadsapi Dio tiadenidsa ima bicani inanajaropaji. Najarojine Diodsa ohuatidsejaro. ⁵Jesocristocca tiquejenadsapi Dio pocca biquehe huapima tiadenidsa inanajaroa Pohujine pocca ima cacomerade nahatoqqiri tiquinajaro. Pohujine naqui Pohua Atti nahatoqqiri tiquinajaropaji. ⁶Aji tiadenidsa Jesocristocca ima ohuacomerapoparopi jidapana ticcadeni madiedsa ahuato tajaropaji. ⁷Najaroa ia Medsede Jesocristo ccanipomahitohui timadimanaccadsapi Diocca daniji dsori tineje cama-jeranitohui. ⁸Ticcadeni jeheniji daco torani dsanaponijine Dio tiadeni tohuacahuabaqqi-dsanapodsapa ajicca dsama jicanicca huada bacco tiquinanijine. Nani ia Medsede Jesocristo ccanipomadsapa ima ticappiramananijine. ⁹Diopa pocca huatinaja inapajiranissa dsanopajaro. Pohua Bedi ia Medsede Jesocristodsa tiquejenanijine titohuideni huahua najari.

Pohuadenira pohuadenira naridsamana-jarahijine

¹⁰Ohuemecotedeni, ia Medsede Jesocristo onima tiadenidsa huati onana: Timecotedeni tedseje jehe ticanirere canaji. Tiadenira tiadenira taridsamana-jeraji, onajaro. Ticcadeni ima bica tanijinepi pina ticajonerara canadsa Jesocristodsara tibodideni ojariqquimananissa tadsa timadimanaji. ¹¹Ohuemecotedeni, ticcadeni ima Cloecca madija ohuadsa huati toquinahi omittajaropi: –Ticcadeni ima bica tejerani. Jehe

ticanirenissa tejerani –quinahi omittadsa tiadenidsa huati onajaro. ¹²Titessedeni mota attidenipa: –Iapi Pablocca iquejenani –quina-raha motapa: –Iapi Apolocca –quinajari. Ohuahadenipa: –Iapi Pedrocca –quinaraha ohuahadeni naco: –Iapi Cristocca –quinahi omittajaro. ¹³Nema tiquinadsapi pina Cristo ticanarobe-manajarissa tinanamanajari. ¿Ohua Pablona ticcadeni imasiri manaconi ohua coba idsanamanajaro ttarane? Totopa naqui ¿ohua oni Pablosa tiadeni topa todsanabaqquimanajari ttarana? ¹⁴⁻¹⁵Ohuapi tiadeni topa odsanabaqqi-jerajarojine Diodsa: –Jehe, tijine bica tani –onajaro. Tiadeni topa odsanabaqquidsapi nassa madijapa: –Pablo pohua onima ia topa todsanabaqquijaride –quina-hitohuiraha nohuerani. Naraha ticcadeni madija pamaha Crispo, Caio najaridenina topa odsanabaqquijaride. ¹⁶Estepana naco pocca madijama topa odsanabaqquijaride. Madija ohuahadenipa nohuerahitide, ohuati ajimani. ¹⁷Cristopa madija topade ohua cadosse-jarajari. Madija tocassiejerahijinecca ima ohuacomera-ridsanijinena ohua cadossejaride. Naraha najaro ima ohuacomera-ridsadsapi ajijaro namicca madijacca nahatohuedsa huati huati onejerade. Nassa ohuattina deni tojadsapi Jeso ahua porimacossanidsa dsoqquejaricca imapi ajimani tojanitohuiraha.

Cristopa Diocca dacorehe caji, nahatohue caji najari

¹⁸Najidsohuedsa toque-jenahijinecca madijapa ahua

porimacossanidsa Cristo dsoqqe-jari tahimari mittamanaraha:
 – Ponimaha – quiquinanajari.
 Naraha ia Diocca tossiejeheDSA iquejenajaropi najaro imadsa:
 – Diocca dacorehea – inajaro. ¹⁹Dio Atti dsodo napojaropi ajima najaro:
 – Nidsa nahatoqquiri najaridenicca nahatohuepi Ohuana onajicanitohui.
 Pohuadeni bodicca tohuattehe naqui ojine tossamonitohui – nahi nade Dio.
²⁰Nahatoqquiri najarideni, mamaridedeni, madija ohuahadeni ajijaro dsamacca ima huatide nahatoqquiri najarideni caji taraha ¿poccadeni nahatohuepi deni tojani ccaqui? Nohuerani. Ajijaro dsamacca nahatohuepi Diojine ponima tojajaro. ²¹Dio Pohua bodi nahato tadsapa atti ajama najari: – “Iapi iara nahatohue icajini” quiquinana-jaridenipa Ohuadsa bacco toquina-jarahitohui – najari. Pohuapa pocca ima bicani mari mari inajarodsa jehe quinajaridenina inassiajabaqquihijine jipa tajari. Najaro ima madija motadenidsapi pina ponimassa najaro.

²²Aja jodiodenipa *canahatori canehe ahuato tani qqui toquina-hijine tohuini quinajari. Dsama Cresiaccia madijadenipa tohuattehe huapi tani tocahatterahijine tohuini quinajari. ²³Naraha iapi ahua porimacossanidsa Cristo dsoqqe-jari tahimarira mari mari ihinaridsa najaro. *Jodiodenipa najaro ima mittamanahijine jiperaqquiri najari. *Jodio quejena-jarajarideni naco najaro ima pohuadenidsa pina ponimassa najaro. ²⁴Naraha Dio ia huahua tabaqquijaripa aji jodio

iquejenajaro, jodio quejena-jarajari, ia huapimadsa pocca ima ahuato tajaro. Cristopa Diocca dacorehe caji, pocca nahatohue caji najari. ²⁵Diocca nahatohuepi pohuadenidsa pina ponimassa naraha Diocca nahatohuena deni tojajaro. Madijacca nahatohuepi ajimani. Dio pocca dacorehe naqui pohuadenidsa pina japari tajarossa naraha pocca dacorehena denima dacorajaro. Madijacca dacorehepi ajimani. ²⁶Ohuemecotedeni, tibodideni huatoma-manaji. Aja titiqueriqquimana nanidsa ajijaro dsamacca madija nahatoqquiri najaridenipa huapi tajarahi. Tiadenidsa naco ajijaro dsamacca deni toquejenajarideni huapi tajarahi, taminedeni naco huapi tajarahi. Naraha Diopa nama naha pocca madija tiquejenanijine tiadeni huahua tabaqquijari. ²⁷Ajijaro dsamacca madijapa madija ohuahadenidsa: – Ssamoqquiri nahi – quiquinanaraha Diopa ssamoqquiri najaridenina icattejidsabaqquijari. Dio nama najaripa madija: – Iapi iara nahatoqquiri inani – quiquinanajarideni ajamani toquejenahijine. Ajijaro dsamacca madijapa madija ohuahadenidsa: – Japariqquiri nahi – quiquinanaraha Diopa japariqquiri najaridenina icattejidsabaqquijari. Dio nama najaripa madija: – Iapi dacoco ijirani – quiquinanajarideni ajamani toquejenahijine. ²⁸Diopa ajijaro dsamacca madija nenebo toquejenajarideni icattejidsabaqqui, huahuatajo toquejenajarideni icattejidsabaqqui, ajamani toquejenajarideni icattejidsabaqqui najari. Dio nama najaripa ajijaro dsamacca imadsa madija deni

toquejenajarideni pohuama inana-
baquihijine. ²⁹Nema nadsapi
madijapa Diodsa: –Ohuana bica
onajaro. Ohua motta nahato
onani –quinahijine ssamo tani.
³⁰Tahidepi aji Dio Pohuajine Jeso-
cristodsa ijariquijaropaji. Pohua-
jine naqui Cristodsa icahatterara
canajaropaji. Cristojine icca ima
Diodsa pajiranissa tajaro. Ibodi
tonahirejari. Imasiridsa imadi-
dsanapo-jeraniijine ia todinibaquiqui-
jari. ³¹Nadsapi pina Dio Atti dsodo
napjarocassa inanana. Najaropi
ajima najaro: –Tetidsemana-
dsapi: “Ojine bica tani, deni ojani”
titiquina nejerana. “Ia Medsede
Pohuajinena bica tani, pohuana
deni tojajari” titiquina nanina bica
tani –nahi nade Dio Atti.

**Jesocristo ahua
porimacossanidsa
dsoqquejari tahimari**

2 ¹Ohuemecotedeni, Diocca
pajissehe ahuatora tapojaro-
cca tiadeni mari ocanabaquini-
jine occadsapi ajijaro dsamacca
deni toquejenajarideni attidenissa
najarodsa huati huati onejerade.
Nahatoqquri najarideni attideni-
ssa najarodsa naqui tiadeni mari
ocanabaquijerade. ²Tiadeni-
dsa omadidsapi obodi ima onihi
tohui onejerade. Jesocristo tahi-
marira odsepe ijina, onajarode.
Aja *ahua porimacossanidsa pohua
dsoqquejari tahimarira huati huati
ohonanajarode. ³Tibaccodeni huaji
tiadeni maride ohuadsa naqui
ocappinadsa ojaparidsapi tacca-
cca ocanade. ⁴Nadsama ohuatti-
dsa jehe tiquinanijine tohuatti
nahatohue cajiniccadsa tiadenidsa

huati huati onejerade. Tiadenidsa
huatide ojadsa, maride ojadsa naqui
tohuatti najora taniccadsara huati
huati ohonanade. Dio Corime ohua
acco camadsa Diocca dacorehe
ahuato onanajarojine occa mari-
najadsa jehe tiquinade. ⁵Nema
nadsapi Jesocristodsa jehe tiquina-
jaropi madijacca nahatohuejine
jerani. Diocca dacorehejinena paji.

**Diopa Pohua Corime dosse
inajari, Dio pocca ima ia
mari tocanabaquihijine**

⁶Naraha jehenijirideni dacorajaro-
deni maride iquejenadsapi tohuatti
nahatohue cajiniccadsa mari icana-
baquijari. Najaro nahatohuepi
ajijaro dsamacca jerani. Ajijaro
dsama cacahuadedenicca ima
jerani. Najaridenipa nidsa jica-
hitohui. ⁷Aji mari mari inajarocca
nahatohuepi Dio pocca. Pohuajine
madijadsa ahuatora tapojaro. Nami
nahato-jeraccadsama Dio tohuini
nadsapa pocca ima inanajorapo-
jaro, pocca deni tojehedsa iquejena-
nijine. ⁸Najaro imapi ajijaro dsama
cacahuadedeni mittamana-jarajari.
Nassa Diocca ima mittamanadsapa
ia Medsede bicabote deni tojajari
inanadsoqquemana-jaranaja.
⁹Naraha aji Dio Atti dsodo napo-
jarodsapi ajima najaro:

–Dio inanajorapojaropi pina aja
qqi toquinapo-jarajaricca,
mittamanapo-jarajaricca,
bodideni huatohuijine
ssamoqquri napojaricca
najaro ima bicani huapima
Pohuadsa huatideni
huanaqquri najaridenidsa
inanajorapojaro –nani nade
Dio Atti dsodo nanidsa.

¹⁰Dio Pohua Corime icadossedsa pocca ima iadsa ahuato inana-dsapi imittajaro. Dio Corimena Dio Pohua inanajorapojarocca qqui qqui dsanapodsapa nahato tajari. Puhuapa Dio Pohua bodicca ima huapima nahato tahissa tajari.

¹¹Madija huapi taraha ¿nejecojarina madija bodideni qquide nahato tajari? Nohuerahi. Madijapa pohua bodicca huatohuena nahato tahi ojari nahi. Najarossa najaro ¿madijapa Dio bodi qquide nahato tajarico? Nohuerahi. Dio Corimena Dio bodi qquide nahato tahi ojari najari. ¹²Nadsama aji iadsa da inajaropi ajijaro dsamacca jerani. Dio Pohua Corimena iadsa da inajaro. Puhuapa iadsa bica tadsa Pohua Corime ia acco camajari, Dio pocca ima bicani iadsa inanajaro imittanijine. ¹³Nadsapi Diocca ima bicani tiadeni mari icanabaquiniijinepi madijacca nahatohuedsa mari mari inejerani. Dio Corime ia mari tocanabaquijaricca tohuattina tiadeni mari mari ihicanabaquini najaro. Nema inajaropi Pohua Corime Atti deni tojaniccadsa huati huati ihinanajaro.

¹⁴Naraha Dio Corime cappiramanajaridenipa Pohua Corimecca marinajatohui quina-jarahi. Pohua Corimecca marinajapi pohuadenidsa pina ponima najaro. Mittamanahissa tajarahi. Dio Corime cajimanajaridenidsana pocca marinaja ahuato tajaro. ¹⁵Dio Corime cajimanajaridenipa ima huapima qquide nahatoqquiri najari. Puhuadenipa: –Ajaropi bica tani, ajarona bica tejerani –quina-hijine pajiramanahi. Naraha Dio Corime cappiramanajaridenipa aja

Dio Corime cajimanajari bodideni huatohue ssamoqquiri nahi. Pohuadenidsa naco: –Tijine bica tejerani –quinahijine ssamoqquiri nahi.

¹⁶Najaro imassa najaropi Dio Atti dsodo napojarodsa ajima najaro:

–¿Nejecojarina ia Medsede bodi nahato tajari?

¿Madija ia Medsede mari icana-hijinepa pajiraco? Nohuerahi –nani nade Dio Atti dsodo nanidsa. Naraha ia Dio Corime icajijarodeni ibodi huatohuepi pina Cristo pohua bodi huatohuessa najaro.

**Dio Atti maridedeni
huapimapa Diodsa dsepedeni
ijjiridsamanajari**

3 ¹Ohuemecotedeni, tiadeni mari ocanabaquipo dsapi pina Dio Corime cajimanajaridenidsa huatidessa onejerade. Timittamananijine tipajiramana-jeradsapi tiadenidsa pina madija ajijaro dsamacca tohuini quinajaridenidsa huatidessa onajarode. Jeso-cristo tahimari tiadenidsa huati onadsapi pina ejedenidsa huatidessa onajarode. ²Occa marinaja najora taniccadsara tiadeni mari ocanabaquipojarode. Pina ejedeni dsamatapa jipade ssamo tadsa dsojora da quinajarissa najaro tiadenidsa nema onajarode. Naraha jidapana naqui nema tidsanapomanani paji naccani. Marinaja najo tanicca timittamananijine tipajiramana-jeraccani. ³Aji tohuini tiquinaccatohui dissera qquiri tiquinaccajaro. Titedsedeni cajimanajaricca acconi naqui tetedimana nani paji naccani. Titedsedeni tedseje naqui ahuaji atti ahuaji atti titiquina nani paji naccani.

Nema tiquinajarojinepi tohuini tiquinaniccatohui disseraquiri tiquinaccani, onajaro. Tijinedeni pina ajijaro dsamacca madijajine-ssa tinanamanajaropaji. ⁴Nadsama tiadeni mota ojaría attipa: – Ohuapi Apolocca – naraha timecote ohuaha attipa: – Ohuapi Pablocca – nadsapa tijinedeni pina madija Dio Atti ssamoquiri najaridenicca imassa tinanamanajaropaji.

⁵Naraha tiadenidsa ohuattipi: ¿Pablopa nejecojari? ¿Apolopa nejecojari? ¿Iapi deni iquejenanicaqui? ¿Nohuerani! Ia ipamehepi Diocca dodosse tabaqqui iquejenajaro. Tiadeni mari icanabaqquijarojine ia Medsededsa pajissa tiquinajaropajide. Ia Medsede ia tocadossebaqquidsa idsepe ijjarode. ⁶Ohua Dio Atti mari mari onapojarocca imapi pina tapa dappo onajarissa najarode. Apolo dsotode tiadeni mari tocanabaqquijaripa pina tapa moro tadsa dope ecahuajarissa najaride. Tapa napijaripa Diona inanapjarissa najaride. ⁷Nadsama aja tapa dappode, cacahuade quinaridenipa tapa moro inanamanahijine ssamomo tahi. Dio Puhuana tapa inanapihijine nahato tahi ojarijari. ⁸Aja tapa dappode, dope cacahuade quinaridenipa najarissa caniquimerajari. Poccadeni tarabidsa manaconipi pahuadenidsa Dio inapajiranissa tanitohui. Pina pahuadeni dsepedeni ijiridsamanajarissa nehe da inaridsanitohui. ⁹Nadsama ohua Apolo tedsejepi Diodsa idsepe ihijiridsa najaro. Tiadenipi pina Diocca huidsajassa, pina odsa Dio icanahatojaro-ssa tiquinajaro. ¹⁰Ohuapi pina odsa nanahatode nahato tajarissa

onajaro. Dio ohuadsa bica tadsa Puhajine Jesocristo tahimari tiadeni mari ocanabaqquijaropi pina odsa ocanahatodsa huehuema ppa oppiridsajaro, ocanapiri najarossa najaro. Ojine odsa canapirijaropi Diocca dodosse ohuahana jaca icananijine, ohuahapa coba icananijine. Najaridenipa tiadeni maride toquejenajari pina odsa jaca icanamanajarossa, pina coba icanamanajarossa quinajari.

Naraha jajacadedeni, cocobadedeni huapimapa dsepedeni panahissá tadsana bica tani. ¹¹Nadsama huehuema bicani ppa oppiridsehe najorajaropi Jesocristopaja. Madija ohuaha huehuema onihi ppa ippiridsanijinepi ssamo tani. ¹²Nadsama aji huehuema bicabotedsa odsa canapirijaro icanahatomananijinepi orodsa, platadsa, siba huatini ccara taniccadsa inahatoridsamananitide. Madija ohuahapa pina tabladsa, bobadsa, dserodsa inahatoridsamananitide. ¹³Naraha nidsa *madija huapimacca ima cattermanijinecca huada bacco tadsapi Diopa dsippo jororonidsa madija huapimacca todsepe ijie ecatamaridsanitohui. Najaro jororonijine madijacca ima bica tajarocca, tabaccora tajarocca, ponimacca naqui Puhadsa ahuato tanitohui. ¹⁴Madija dsepe ijjaricca jororonidsa diji tocana-jeradsapi manaconi cajihitohui. ¹⁵Naraha ohuaha dsepe ijjaricca diji tocana-dsapi huapima amossihuajanitohui. Puhuana oppinani ahuaraha tossiajahitohui. Pina madija pocca odsa diji tocanadsa joppa tadsa dsori tajarissa nahitohui.

¹⁶Tiadenipi ¿ajijaro ima ssamoquiri tiquinaccaqui? Aji

Jesocristodsa jehe tiquinajaropi Dio pocca mamadi tiquejenani. Aja Dio Corimepa tiadenidsa mamadiridsa najari. ¹⁷Diocca mamadipi ssiaja, huire tani. Najaropi tiadeni. Madijapa Diocca mamadi inatabaccoradsapi manaco Dio najari madija inatabaccorahitohui.

¹⁸Nadsama tiadenipi tiadeni ticamaidsanimana tejeraji. Aja tiadeni mota bodidenipa: –Iapi ajijaro dsamacca nahatohue huapima nahatoququiri inani –quiquinanaraha najaro ima nebomanahissa tadsa pina madija ssamobotessa quinana, nahi nahatohue pajissaccara tocahatterahijine.

¹⁹Ajijaro dsamacca nahatoququiri najaridenicca nahatohuepi Diodsa ponima tojajaro. Dio Atti dsodo nanidsapi ajima najaro: –Madija ajijaro dsamacca nahatoququiri najarideni poccadeni maidsehe najoramanaraha Diojine poccadeni maidsehedsa pohuadenina tohuittanimanahitohui –nani nade Dio Atti dsodo nanidsa.

²⁰Dio Atti dsodo nani onihi naqui: –Ia Medsedepa ajijaro dsamacca nahatoququiri najarideni bodideni huatohue nahato tajari. Pohuadsapi bodidenicca huatohue ponima tojajaro –nani nade Dio Atti dsodo nanidsa.

²¹Nadsama madijadsara tetidsemana tejeraji. Tettidenipi: –Ia maridena denima bica tajari. Pohuadsa iquejenadsapi deni iquejenajaro –tiquinanitide naraha nema tiquina tejeraji. Diopa huapima tiadenidsa da inajaro, tiadenidsa bica tanijine. ²²Ohua Pablo, Apolo, Pedro inajaropi

ticcadeni iquejenajaro. Ajijaro dsama huapimacca tiadenidsa tojajaro. Camittehe, dsoqqehe, jidapanacca ima, nidsa dsotodecca ima naqui najaro huapimapi ticcadeni. ²³Tiadenipi Cristocca. Cristopa Diocca. Epejeni.

Jesocristocca dodosse tabaqqi dsepedeni ijimanajari tahimari

4 ¹Tiadenipi icca ima tibodideni huatoma-manadsa ajima tiquinaji: –Pablotenipa Cristocca medse, pocca dodosse tabaqqi toquejenajari. Dio pocca ima bicani ahuatora tapojaro maride icadossebaquijaria –tiquinaji, onajaro. ²Nadsama dossehe cajimanajarideni pohuadeni dossedecca dosseniji inapajiramananissa tanijine. Nama nadsapa pohuadeni dossedede, madija huapima naco pohuadenidsa: –Jehe, tijinideni bica tani –quinahitohui. ³¿Nadsama ohuadsa nejecoma tiquinani? ¿Pina ohua dossedecca dossenijissa onanajaroqui? Occa marinaja tinocodsamanadsa naqui tiadenidsa bica teje, bica tejereje naraha najaropi ima bedeni. Ajijaro dsamacca ima cacattemadedeni occa ima icattemamanadsa naqui obodi huatoto cana-gerani. Aji ohua naqui: Ojine bica tani, bica tejerani, onejerani. ⁴Obodi huatomadsapi: Ima ocappirani, onaraha ima ocajinitide. Ohua Medsedena obodicca ima nahato tajari. Pohuana obodicca, odsepe ijiecca nattomede pajirahi. ⁵Nema najarao ia Medsedecanipoma-jaraccadsapa tiadenipi madijacca ima nattome tiquinejeraji. Titessedenidsa: –Tijinideni tabaccora tani –tiquinejeraji. Nidsa

ia Medsede ccanipomadsana pohua ssejenedsa ima huapima ahuatoma-ridsanitohui. Aji ia huapima ibodicca ima ecomajaro pohuajine ahuatoma, ibodidsa tohuini inajarrocca ahuatoma naridsanitohui. Nadsapa bica inanajarocadsa Diopa iadsa: –Tijinedeni bica tani –nahitohui.

⁶ Ohuemecotedeni, aji Apolo tahimari huati, ohua otahimari huati onajaropi ticahatteradsa ticcadeni ima tobicanijine. Itahimaridsa ticahatteradsapi Diocca dosseniji dsodo nanidsa ima onihitinaharimana-jeranijine. Aji itahimaridsa ticahatteradsa naqui tiadeni maride ojaría deni tinanamana-jarahijine. Pina tiadeni maridedsa tetidsemanadsa: –Ia maridepa deni tojahi –tiquinadsapi ohuahapa ajamani tinanamanaajari. ⁷ Naraha ¿nejecojarina titessedeni ajamani inanabaquidsa tiadeni deni tonanabaquijari? Naraha tiadeni huapimapi pina titessedenissa tiquinajaro. Huapima ticajimanajaropi Dio tiadenidsa da inaridsajaro. Pihuajine ticajimanadsapi: –Ia motta nahatoqquiri inajarojine icajijaro –tiquina tejeraji.

⁸ Tiadenipi pina ssequiri najaridenissa tiquinajaro. Tohuini tiquinanicca huapima ticajimanani. Tiadeni acco icamabaquiniijineraha iadsa jiperaqquiri tiquinajaro. Pina taminessa taridsamanajaro. ¡Jaho, tamine tiquejena naccaraho! Ia naqui tiadenidsama dossede iquejenanitohuiraha. ⁹ Obodidsapi: Jesocristocca dodosse tabaqqi iquejenajaropi Djojine dsotodehuaji iquejenajarossa inajaro. Pina todsepe toquejenajarideni

jicahijinessa inanijine Dio ia tonanajoro-baqqijari itidija, onajaro. Iapi pina jidsaqquri inajarossa inadsa ajijaro dsamaccá madijadeni, Diocca dodosse tabaqqi memehuajicca tedseje ia qquide cattomama canajaripaja. ¹⁰ Aji iapi Jesocristodsá disse-ssera inajarojine iadsa: –Ssamoaqquri nahi –quinaraha tiadenidsapa: –Jesocristocca nahatohue cajimanahi, nahatoqquiri nahi –quiquinanajari. Iadsapa: –A, japariqquri nahi –quinaraha tiadenidsapa: –Dacoraaqquri nahi –quiquinanajari. Ia ajamani tonanabaqqi-manaraha tiadenidsana: –Deni toquejenahi –quiquinanajari. ¹¹ Icca imapi ajimanajonajaro: pemi imadi, ibacco dsarie imadi, etero icappirehe imadi najonajaro. Madijajine huahuacca iquejena najonajaro. Imadinijine odsá icappirehe imadiridsa najaro. ¹² Idsepe ijidsa naqui ja iquejenehe imadiridsajaro. Madijá naco ia tototamasso-baqqimana naraha ima bicanira pohuadenidsa ehecomera najaro. Ia totonajidso-baqqimana nadsa naqui nema nehe ihinahana najaro. ¹³ Madijá ia totamasso-baqqimanadsa naqui mohuaradsa etti bica tadsa attideni ehecomera najaro. Ia huahuattajo tonanabaqqi-manadsapa pina dsama nemanehacca *basurassa inajonajaroa ajijaropaji. ¹⁴ Nadsama aji tiadenidsa dsodo onajaropi ticappinamananijine jerani. Ticcadeni ima tobicanijine onadsa tiadenidsa dsodo onajaro. Tiadenipi pina occa ejedenissa tiquinajaro. Tiadenidsa ohuati huana tani. ¹⁵ Aja Jesocristo

tahimari maride tiadenidsa tohuapidsapa pina 10 mil quinahitide naraha tiadeni maride pina ticcadeni abissa najaripa huapi tajarahi. Aji ohuana pina ticcadeni abissa onajaro. *Jesocristo tahimari icassiejeranijinecca tiadenidsa huati huati onajarojine pohuadsa jehe tiquinajarode. ¹⁶Nema nadsapi tiadenidsa ajima onajaro: Pina aji occa madiessa tinanamanaji, onajaro.

¹⁷Nema onadsapi tiadenihuaji Timoteora dosse onajari. Puhuapa ojine Jesocristodsa tojadsapa pina occa ejedenissa najari. Pohuadsa ohuati huana tani. Puhuapia Medsede tahimaridsa dissera tajari. Occa marinaja pina Jesocristo mari mari naridsajarissa najaro tiadenidsa huati tahitohui, tibodideni huatoma-mananijine. Najaro marinajapi aji Jesocristodsa quequeriquimana nahihuaji mari mari ohocanaridsabaqqui najarissa najaro. ¹⁸Naraha motadeni attidenia: –Ia motta nahatoqquri inani –quiquinanajari. Najaridenipa ohuadsa cappinamana-jaradsa: –Pabloa ia qquide ccajona-jarahitohui –quinajari. ¹⁹Naraha nani tiadeni qquide occabote nani. Ia Medsede jipa tadsapa occanitohui. Nidsa tiadenihuaji bacco onadsapi aja –Nahatoqquri inani –quiquinanajaridenicca madie qqui onaridsanitohui. Pohuadenipa ima huatide nahatoqquri naraha ¿pajissa Diocca dacorehema madimanajarico? onajaro. ²⁰Diocca cacahuehedsa iquejenadsapi ima huatidera nahato inani ojarijerani. Diocca cacahuehepi pocca dacorehema imadijarona paji.

²¹Nidsa tiadenihuaji occadsapi ¿ohuatti dacorajarodsa tiadeni onajidsobaqquijarossa onanijinequi? ¿Tohuati huanehema ohuatti bica tajarodsa tiadenidsa huati onanijinerane? Nadsapi ¿nejecojarodsa jipaqquri tiquinani? onajaro.

Huananehe cajijari ettajomanahijine

5 ¹Titiqueriqui nanihuajicca madija ojaría huananehedsa madijaricca ima madija huapima nahatoqquri nahi. Najaria aja imeni onihiraha pocca amoneje tojajaro. Nema najaro imapi tabaccora tani. Diodsa jehe quina-jararidenidsa naqui oppina tani. Naraha najaro ima tiadenidsa anini. ²Jaho, tiadenipi: –Icca madie bica tani –titiquina naraha ¿nejecotohui pocca tabaccorehedsa oji tiquinejerajaro? Najari madijapa tiadenidsa qqequequedsima najarahijine dosse tininemanajo, onajaro. ³Ohuassire tiadenidsa huaji onaraha titohuideni obodi huatomadsapi jidseraqquri tiquinajaro. Pina tiadenidsa omadjarossa najaro. Nahicca madija imasiri tonanajari naco onacasserajaripaja. ⁴Ia Medsede Jesocristo onima pocca ima ticattemamananijine tiqueriquimanadsapi ohuanaqui tiadenidsa oquejemajarossa nanitohui. Jesocristocca dacorehe naqui tiadenidsa anitohui. ⁵Najari maqquideje imasiri tonanajaripa Satanadsa tinanamanajo. Nahi pohua assirepi amosí naraha nidsa ia Medsede Jeso ccanipomadsa pohua corimena tossiajahitohui.

⁶Nadsama najaro ima tiadenidsa anidsapi tetidsemanadsa: –Icca madie bica tani –tiquinani bica

tejerani. Aja *pan ssaja tahijine quequejemacca ima nahatoququiri tiquinani. Trigo bono ria nahi imedsa quequejema badsira taha quejemadsapa ssajaja tahi. Najaro-ssa najaro madija ojariacca imaraha huapimadsa ssaja taridsa tani. ⁷Nadsama pocca imasiri ssaja taridsa-jeranjine tinebomanajo, pina jodiodenicca ejete *Pascoa anidsapi pan ssaja tahijinecca quequejema inebomanajari-ssa tinanamanajo. Pina pan dsati quequejema jirahaccassa tiquinaji. Cristopa itohui dsoquejari. Pina icca edede bedi Pascoadsa dsoquejarissa najari. ⁸Nema nadsapi pina Pascoacca ejetedsa etidsejarossa inana. Icca madie dsatidsa imadidsapi quequejema jadahi jiraha imadi-dsanapona. Najaro imapi tabaccorehe, imasiri nemaneheneboridsadsapi pajissehema, maidserehema Cristodsa etidse-dsanapoparopaji.

⁹Nadsama aji occa ima teppe tiadenidsa dsodo onapoparopi ajima onajaro: Nahicca madija huananeheda disseraquiri najaridenidsapi tiquejemamana tejeraji, onajarode. ¹⁰Naraha ohuattipi: Jehu quina-jarajaridenidsa tiquejemamana tejeraji, onejerani. Ajijaro dsamadsa madimanajaridenipa huananehe cajimanajari. Madija ohuaha dsepetaji acconi huadiquiri najari. Todsepetajitohui, dsinirotohui maidsaquiri najari. Madija ohuahadenipa botijidede rajari. Siba nahatonidsa naco huahuatidsemana najari. Ajijaro dsamacca madijapa nama quinaraha pohuadenidsa iquejemajaro. Ajijaro dsama inebodsana pohuadenidsa

iquejema-jeranjineraha najaropi ssamo tani. ¹¹Naraha ohuattipi ajima najaro: Madija: –Iapi timecotedeni iquejenani –quina-rahaha imasiridsa disseraquiri nadsapa najaridenidsapi tiquejemamana tejeraji, onajaro. Pina aja huananehe cajimanajarideni, dsinirotohui mamaidsamana najarideni, siba nahatonidsa huahuatidsemana najarideni. Pohuadeni tessedsa ima ponimacca huatijidede rajarideni, noccodeni janoquiri nahijine dsejidede rajarideni, bobotidedeni naco. Nama quinarjaridenidsapi poccadeni odsahuaji bacco tidsimamana tejeraji. Pohuadenidsa naqui tijipamana tejeraji, onajaro. ¹²⁻¹³Ohuapi Diodsa toquejena-jarajaridenicca ima cattemade ojajerani. Diona poccadeni ima icattemanitohui. Aji tiadeni Diodsa tiquejenajaropi ticcadeni ima tiadenina cacattema titicana naji. Nadsama nahicca imasiri tonanajaripa tiadenidsa quejema-jarahijine tinebomanajo, onajaro.

**Jesocristocca quejena-
jarajarihuaji ima cattemade
jajahi toja najari**

6 ¹Nadsama timecotedeni ojariapa pohua imecote tedseje ima cajimanadsa ¿nejecotohui timecote Dioccaraha ajijaro dsamacca ima cacattemadehuaji pohua imecote iaccajari? Najaridenipa Diodsa jehi quina-jarahi. Diodsa jehi quinarjaridenidsana poccadeni ima cattemade tohuededsimahijinenana bica tajaro. ²Tiadenipi ¿ajijaro ima ssamoquiri tiquinaccaqui? Nidsaranibote Diodsa madija iapi dsama huapimacca madija imarideni icattemanitohui.

Nidsa madija huapimacca ima cattede tiquejenanijneraha ¿jidapanacca ima bedeni cattede depi tipajirama-jerajaroqui? ³Ajaro ima naqui ssamoquiqui tiquinanitide: Nidsaranibote Diocca dodosse tabaqui memehuajicca imarideni naqui iana icattede nitohui. Diojine ipajiranissa tadsapi icca madiacca ima icattede manijine ipajirani. ⁴Nadsama ajijaro dsamadsa timadimanaccadsa timecotedeni tedseje ima ticajimanadsapi ¿nejecotohuira ajijaro dsamacca ima cacattede denihuaji jajahi tija najaro? Najaridenipa Jesocrisodsa titiqueriqui nadsa tiadenidsa quejemamana-jarahi. ⁵Aji tiadenidsa ohuatti nema onajaropi tijabojo-mananijine, onajaro. ¿Nahi tiadenidsapa madija ima cattede nahato tajari nohuerajaro? ¡Anihitidija! ⁶Naraha timecotedeni tedseje ticahadiredsa ima ticajimanadsapi ima cacattede denihuaji titiaccabaquimana najari. Najaridenipa Diodsa jehe quina-jarajarideniraha. ⁷Naraha jehe quina-jarajaridenihuaji timecotedenidsa ima tinassonarimanadsapi ticcadeni imana totabaccorajaro. Nadsama ticcadeni ima totabaccorani noppinenipi pina ajima tinanamananina bica tani: Timecotedeni tiadenidsa ima inamanadsapi nema nehe tinahanamanaji. Ticajijarocca nemanehe timecote ibotidsa naqui: –Epejena, jehe quina-jarajaridenihuaji pohua ohuacca-jarana –tiquinaji. ⁸Naraha tiadenipi nema tiquinejerani. Timecotedenidsa ima titinanamana najaro. Timecotedeni ticamadsabaquimanadsa naco titibotimana najari.

⁹Tiadenipi ¿ajijaro ima ssamoquiqui tiquinaccaqui? Tabaccorehe inanamanajarodenipa *Diocca cacahuehehuaji toquejena-jarahitohui. Paji, madija tiadeni tocamaidsabaquimanarana. –Imasiri inanani oppinera tani –quiquinanaraha pajissa tiquinejeraji. Aja Diocca cacahuehehuaji madimanajarahijinepa huapi tajari. Puhuadenipa huananehecca disseraquiri najarideni, siba nahatonidsa huahuatidsemana najarideni, maquideje madija ohuahacca amoneje ahajadedeni, amoneje maqui cajiraha maquideje ohuaha najaradedeni, maquideje pohuadeni tesse dsoto ahajadedeni naco Diocca cacahuehehuaji madimana-jarahitohui. ¹⁰Aja bobotidedeni, dsepedeni ssequiri nahijine tohuini quinajarideni, noccodeni janoquiqui nahijine dsejidede rajarideni, madija pohuadeni tessedsa ima ponimacca huatijidede rajarideni, dsinirotohui mamaidsadedeni naco Diocca cacahuehehuaji madimana-jarahitohui. ¹¹Tiadeni motapi najaridenissa tiquinaporaha Dio tiadeni tonahirebaquijari. Puhujine Puhuadsara tiquejenajaropaji. Ia Medsede Jesocrisoto puhujine, icca Abi Dio Puhua Corimejine naco ticcadeni ima Diodsa tobicajaropaji.

Essirepi Diocca, ia ecahuanissa tanijine

¹²Madija attidenipa: –Iadsa oppina tanicca nohuerani. Ia tohuini inanacca huapima inananijine bica tani –quiquinanahi titimittamana najaro. Naraha ohuattipi: Paji, tohuini tiquinanacca huapima tinanamananijine

bica tejeranitide, onajaro. Ohuapi ohua tohuini onajarocca ohuadsa deni tojanijine jipera onani. Najarocca medse ojajeranijine ohua ohuacahuajaro. ¹³Nadsama madija attideni onihi naqui ajima najaro: – Idsone badsinipi dsamatapajine, dsamatapapa idsone badsinicca – quiquinanajari. Naraha nidsa Diojine najaro pamehepi jicanitohui. Naraha essirepi pajissa huananehejine jerani. Essirepi ia Medsedecca. Ia Medsedepa essirecca. ¹⁴Diojine ia Medsede nahatonidsapa ia naqui najarissa inanitohui. Dio pocca dacorehema ia tonahatonibaqquihitohui.

¹⁵Tiadenipi ¿ajijaro ima ssamoqquri tiquinaccaqui? Ia essire ojari, ojari inaridsaraha Cristo pohuadsa itassaqquidsapi pohua assire ojarijarissa inajaro. Ajina ¿Cristo pohua assire mota ojine amoneje huananaridsa tojahijineco? Nohuerani. Iapi nema inejerani. ¹⁶Tiadenipi ajijaro ima ¿ssamoqquri tiquinajaro ttarane? Maqquideje amoneje huananaridsa tojadsapa poni tadsajani ojaría tojahitohui. Dio Atti dsodo nanidsapi: – Maqquideje amoneje tadsajani assiredeni pamaraha pina ojarijarissa quinanajari – najaro. ¹⁷Naraha madija ia Medsedecca toquejenadsapa pohuadeni corime ia Medsededsa ojariqquimanaha toquejenajari.

¹⁸¡Huananehe tinamana-jeranijine tiajimanani naji! Madija imasiri onihi onihi inanamanajaropi pohuadeni assiredsa tabaccorehe inanamana-jerani. Naraha huananehe inanamanajarona pohuadeni assiredsa imasiri inanamanajaro. Pohuadeni assire

inatabaccoramanajaro. ¹⁹Naraha tiadenipi ¿ssamoqquri tiquinajaroqui? Aji tessiredenipi Dio Corimecca mamadi. Diopa tiadenidsa Pohua Corime da inaridsajaro. Najaria tiadenidsa madiridsajari-paja. Tessiredenipi ticcadeni jerani. ²⁰Diopa ticassiejeranijine manaconi huatini ccara tajarodsapa tiadeni mita tabaqqujari. Nadsapi ticcadeni ima Diodsa bica tanijinepi tessiredeni tecahuamananissa taji. Dio Pohua jipa tahiccara tinamanajari.

Cajicajicca imadsa bodideni huatoma-manahijine

7 ¹Ima ohuadsa dsodo tiquinapojaropi ajima nade: – ¿Maqquideje amoneje caji-jaradsa madihi bica taqui? – tiquinade. Jidapanana najaro ima ohuacomerana. Jehe, maqquidejepa amoneje caji-jaradsa madihi bica tani. ²Naraha huananehepi cajiridsani. Najaro noppineni amoneje titicajimanerinanina bica tani. Ticcadeni amoneje ohojariri naji. Amoneje naqui maqquideje ticajimanadsapi ticcadeni maqqui ohojariri najo, onajaro. ³Nadsama tecajiredsapi ticcadeni amonejedsa tiadeni accoraqquri tiquinana, ticcadeni ima bica tanijine. Amoneje naqui tecajiredsapi ticcadeni maqquidsapa tiadeni accoraqquri tiquinana, ticcadeni ima bica tanijine. ⁴Maqquideje amoneje tadsajani cacajiredsapa amoneje assiranipi ponicca jerani. Maqquina poni assirani jinede. Maqquideje naco pohua assirepa pocca jerani. Amonejena pohua assire jinede. ⁵Nadsama maqquidejepa pocca amonejedsa pohua

ccaccocco-jarana. Amoneje naqui ponicca maququidsa poni ccaccocco-jerana. Naraha Diodsa huatidera ojari naccanijinepi ticca amoneje tadsajani jehe ticaniredsa ajaniji tinebocossamanaccani bica tani. Dsotodena ajaniji tidimamana-pomana, onajaro. Nema tiquinejera-dsapi Satana tiadenidsa ssonacossadsapa imasiri tinanamanarana, onajaro.

⁶Aji badsira tehe ajaniji tinebocossamanaccani bica tani onajaropi tiadeni odossebaquijerani. —Nema inana —tiquinadsapi nema tiquinani bica tani, onajaro. ⁷Ohua ohuatti bodipi: Madija ohuaha-denipa cajimanerahi pina ohuassa quinahina bica tani, onaraha Diona paja. Puhuana madijadsa pocca daniji onihi onihi da inaridsajaro. Madija motapa amoneje jiraha madimanahijine inapajirabaquijari. Motapa amoneje inacajibaquijari.

⁸Nadsama maququideje tabiradeni, amoneje tabiradeni, aji maququi dsoquuedsa tabira tocajamanajaro, maququideje bedimeni dsoquuedsa tabira tocajamanajari quinajaridenipa cajimana-jaradsa pina ohuassa quinahina bica tani. ⁹Naraha tabira pohua motta madihijine pajira-jaradsa amoneje tohuini nadsapa icajinijine bica tani. Amoneje naqui maququideje tohui nadsapi icajihijine bica tani. Cajimana-jaradsa tohuini nacomehe dacoradsapi ocasserani ahumana-hitohui.

¹⁰Nadsama tecajirejarodeni-dsa ohuattipi: Ticanebore tejeraji, onajaro. Nema onajaropi ohuatti jerani. Ia Medsedecca dosseniji.

Amoneje maququideje cajijaropi ponicca maququi inebo-jarahijine. ¹¹Naraha amoneje maququi inebo-dsapa maququideje jirehe cajirani madi-dsanapona, onajaro. Maququideje jirehe madide jipera tadsapi ponicca maququi tedseje poccadeni ima icattemamanadsa tohua-cajirenipomahijine bica tani. Maququideje naco nama nahijine, pocca amoneje inebo-jeraniijine.

¹²Nadsama tiadeni motadsa naqui huati onajaro. Ajijaro imapia Medsedecca jerani. Ohua occa marinaja. Aji timecotedeni ojariacca amonejepi Jesocristocca jeraraha pohuadsa madi-dsanaponijine jipa tadsapi epeje, madina. Pocca amoneje inebo-jerana, onajaro.

¹³Nadsama timecotedeni ojariacca maququipa Jesocristocca jararaha ponidsa madi-dsanapohuijine jipa tadsapa apaja, madina. Ponicca maququi inebo-jarana, onajaro.

¹⁴Nadsama Jesocristocca jarajaripa bedimeni jehe najarodsa madidsapa poccadeni cajinajacca ima Diodsa bica tani. Amoneje Jesocristocca jerajaro naqui ponicca maququi jehe najaridsa madidsapi poccadeni cajinajacca ima Diodsa bica tani. Poccadeni ejedenideni naco pina madija Dio Atti ssamoququiri najaridenicca ejedenissa quina-hitohuiraha nama quina-jarahi. Puhuadeni naco Diodsa bicaququiri najari. ¹⁵Naraha Jesocristocca jerajaro ponicca maququi jehe najari inebohujine tohuini nadsapi epeje, pohua inebojari. Maququidsapi ima nohuerani. Puhuadsa cajinajacca ima jicani. Jesocristocca jarajari bedimeni jehe najaro inebonijine tohuini nadsapa apaja,

poni inebojaro. Bedimenidsapi ima nohuerani. Ponidsa cajinajacca ima jicani. Diopa pocca madija mohuaradsa jonehema madimana-hijine tohuini najari. ¹⁶Tibodideni huatoma-manaji: Aja ticca maqqui Jesocristocca jarajari tedseje timadi-dsanapodsapi pohuapa Diodsa tojahitide. Ssamo tinani. Ticca amoneje Jesocristocca jera-jaro tadsajani timadi-dsanapodsapi ponipi Diodsa tojanitide. Ssamo tinani.

**Dio iadsa huahua napods icca
madie najarossa najarodsa
imadi-dsanaponijine**

¹⁷Aji ticcadeni madiacca imapi pina tecajiredsa, tecajire-jeradsa naqui Dio tiadenidsa huahua napodsapa najarossa najarodsa timadimana-dsanapoji. Najaro imapi Jesocristodsa totoqueriqquimana nahihuaji huapimadsa huati onaridsajaro. ¹⁸Madija jodiodenicca *huissinaja cajipojari Dio pohuadsa huahua nadsapa nama naha madi-hijine bica tahi. Huissinaja cappirajari naco Dio pohuadsa huahua nadsapa nama naha madina.

¹⁹Huissinaja ticajimaneje ticappiraneje najaro imapi ponimacca. Najaro imadsapi Diodsa ibica-jerajaro. Diodsa ibicanijinepi pocca dossenijidsa ibora inadsana bica tajaro.

²⁰Nadsama tiadenipi Jesocristodsa tiquejenanijine Dio tiadenidsa huahua napodsapa ticcadeni madie najarossa najarodsa timadimanasanapoji. ²¹*Madijacca dodosse tijapojaro Dio tiadsa huahua nadsapa epeje, madijacca dodosse tijadsanapoji. Najaro imadsa tibodi

huatoto cana-jeraji. Naraha tia dossede tia tappa tahijine jipa tadsa tiadsa apaja nadsapa tiara timadini bica tani. ²²Nadsama aja madijacca dodosse Jesocristodsa tojadsapa pina madija tappa tabaqqujari-denissa najari, pohua Medsede Jesocristodsa dsepe ijihijine. Madijacca dodosse toja-jarajari naco Jesocristodsa tojadsapa pina Jesocristocca dodossessa najari, pocca dossenijidsa ibora tahijine. ²³Diopa timanaconedeni huatini ccara tajarodsa tiadeni mitta tabaqqujari, pocca tiquejenanijine. Diocca dodosse tiquejenaropi madijacca dodosse tiquejena-jeraji. ²⁴Ohuemecotedeni, aji Jesocristodsa tiquejenanijine Dio tiadenidsa huahua napodsapa ticcadeni madie najarossa najarodsa timadimanasanapoji, onajaro.

**Tabiradenidsa,
cajimanajaridenidsa naco
Pablo huati tajari**

²⁵Jidapana tabiradenicca ima huati onana. Najaro imapi ia Medsedecca dosseniji jeraraha pohuapa ohuadsa bica tadsa ohua tonahattajari. Nadsapi ohuattidsa pajissa tiquinanijine bica tani. ²⁶Jidapapi ajijaro dsamadsa ocasserani eridsajaro. Nema nadsapi maqquideje amoneje cajimana-jarajaridenipa nama dsanapomanahijine bica tani. Cajimanajari-deni naco nama dsanapomanahijine bica tani, onajaro. ²⁷Amoneje ticajimanajarodenipi ticcadeni amoneje nebomana tejeraji. Amoneje ticappiramanajarodenipi amoneje-tohui taridsamana-jeraji, onajaro. ²⁸Naraha amoneje ticajinijinepi

imasiri jerani. Amoneje tabiradeni dsohuatodeni naqui maqquideje cajimanani bica tani, imasiri jerani. Naraha tecajiredsapi paji, ajijaro dsamacca ocasserehe tiadenidsa ssonarinitohui. Najarojine occa ima tiadenidsa jidapana dsodo onajaro, tecajire-jeraccadsama timittamana-nijine, nani dsotodepi oji tiquine-jeranijine.

²⁹ Ohuemecotedeni, aji huati huati onajarocca imapi ajima najaro: Iapi huajano huapi taha imadi-jerani. Nadsapa maqquideje amoneje cajimanajaridenipa pina aja amoneje cappiramanajaridenissa quinana. ³⁰ Oji oji quinajarideni naco pina oji quina-jarajaridenissa quinana. Huatidsemaneri najarideni naco pina huatidsemana-jarajaridenissa quinana. Todsetetaji mimittadedeni naco pina todsetetaji cappiramanajaridenissa quinana. ³¹ Ajijaro dsamacca biquehe cajimanajarideni naco pina najarodsa dsepedeni ijimana-jarajarissa quinana. Ajijaro dsama qqui inajaropi jicanitohui.

³² Ajijaro dsamaccadsa tidsepedeni ijimanadsapi najarotohui tibodideni huatoto canajaro. Naraha najarotohui tibodideni huatoto cana-jeranijine tohuini onani. Maqquideje tabiradenipa ia Medsededsara dsepedeni ihijimana najari. Bodidenipa: –¿Nejecoma onanadsana Dio onahatidsehijine? –quiquinanajari. ³³ Naraha amoneje cajimanajaridenipa ajijaro dsamaccatohui, poccadeni amoneje inahatidse-baqquimananjine tohui bodideni huahuatomana najari. ³⁴ Nama quinadsapa pohuadeni bodicca huatohuepi carobejaro. Amonejedenicca ima naqui pina

maqquidejeccassa najaro. Amoneje maqquideje cappiramanajaro-denipi ia Medsededsara dsapanideni ihijimana najaro. Ponideni assiranima, bodinidenima Diodsara huahuatidsemana najaro. Naraha amoneje maqquideje cajimanajarodenipi ajijaro dsamaccatohui, ponidenicca maqqui inahatidsebaqquimananjine tohui bodinideni huahuatomana najaro.

³⁵ Ticcadeni madie tiadenidsa najo tanijine huati onejerani. Tiadeni acco ocamabaqquinijinena huati onajaro. Ia Medsededsa tidsepedeni ijimana-dsanapodsapi pohuadsa timadimananissa tanijine. Ima onihi tohuini tiquinejeradsapi Diodtohuira disseraqquri tiquinanijine onadsa tiadenidsa dsodo onajaro.

³⁶ Dsabisso dsohuato icajinijine tohuini nadsapa imehidsa huati tapodsa ponicca huajano bacco tadsapi cacajirehi bica tani. Najaropi imasiri jerani. ³⁷ Naraha maqquideje ohuahapa: –Amoneje jirehe omadina –nadsapa amoneje jiraha madihi bica tani. Pohuadsa: –Amoneje ticajiji –quina-jaradsa, pohua cacahuahijine naco bodi nahato tadsapa pohua motta madina, onajaro. ³⁸ Maqquideje amoneje cajidsa bica tani. Caji-jaradsa naco denima bica tani, onajaro.

³⁹ Nadsama amoneje maqqui cajijaropi ponicca maqqui madicadsapa pohuadsa madidsanapocahijine, inebo-jarana. Naraha ponicca maqqui dsoqquedsa poni jipa tadsapi maqquideje ohuaha Diodsa jehe najari icajihi bica tahi, onajaro. ⁴⁰ Naraha amoneje ponicca maqqui dsoqquedsapa maqquideje ohuaha icajipoma-jaradsana denima bica

tani. Nema nadsapi poni bodini bica tehe madi-dsanaponijine, onajaro. Ohuatti nema onajaropi Dio Corimejine obodi nahato tadsa huati onajaro.

Siba nahatonidsa bani da quinahicca ima

8¹Jidapanana dsamatapa, bani naha siba nahatonidsa da da quiquinanajaricca ima ohuacomerana. Najaro imapi ia huapimadsa ahuato tani. Nahatoqquri inaraha paji, nahatohuepi ia deni tonana tani. Tohuati huanehena denima bica tani. Najaropi icca jeheniji tonadacora tani. ²Madija atti: –Ohuapi ohuattajaro, huapima nahato onani –najaripa badsira tehera nahato tajari. ³Naraha madija Diodsa huati huana tadsapa pohuadsa Dio nocco jidsera tajari.

⁴Nadsama siba nahatonidsa bani da tahicca jipade ¿oppina taqui? ¿Oppinera taqui? Najaro ima tiadenidsa ohuacomerana. Iapi pajissa nahatoqquri inani. Siba nahatonipi ajijaro dsama nemanehedsa camittehe cappirani, pajissa ia Cacahuade jerani. Diona ia Cacahuade ojarihi. ⁵Naraha madija ohuahadenipa namidsa anjaricca, memedsa anjariccadsa naco: –Dio, dio –quiquinanajari. Najaroa aji poccadeni ima pina dio huapi tajarissa, pohuadeni medsede huapi tajarissa inananajaripaja. ⁶Naraha iadsapa Dio ojarihi icca Abi memehujicca. Pohuana huapima inahatoridsajari. Pohuadsa imadidridsajaro. Ia Medsedepa ojarihi Jesocristopaja. Pohuajinena huapima aniridsajaripaja. Najaroa aji iapaji.

⁷Naraha imecotedeni motapa Diojine huapima nahatoridsajari-cca ima ssamoqquri naccajari. Pohuadenipa Jesocristods toquejena-jaraccadsapa siba nahatonidsa: –Pajissa icca dio –quiquina-naccade. Jidapana naco siba nahatonidsa bani da quinahicca jipamanadsa bodidenipa: –A ¿pina siba nahatonidsa huahuatidsemana najaridenissa inajaroqui? –quina-jari. Nadsapa bodideni japariqquri najarijine attidenipa: –Jaho, Diodsa ima oppina tanicca inajaro –quinajari. ⁸Nadsama icca ima Diodsa bica tanijinepi ijipajarocca imajine jerani. Bani ijipadsa ibica-jerani. Bani ijipa-jeradsa naqui itabaccora-jerani. ⁹Nadsama siba nahatonidsa bani da tahicca oppinera tahi nahatoqquri tiquinara paji, najaro imadsa timecotedeni japariqquri najarideni imasirdsa toquejenarana, onajaro. ¹⁰Aji nahatoqquri tiquinajarodeni siba nahatonidsa bani dada quinahuaji jipaqueiedsa jai tijedsimadsapi aja timecote japari tajari jipade tiquejenani qqui tadsapa: –A, bani siba nahatonidsa dada tahicca jipade oppinera tanitide. Ohua naqui ojipana –nadsapa pohua naco nahihuaji jipade toquedsimarana. ¹¹Nadsama tiadenipi: –Nahatoqquri inani, oppinera tani –tiquinaraha tijinedeni titesse japari tajaripa ima onihidsa bodi quejemajaro. Cristopa pohuathui dsoqqueraha tijinedenina pocca jeheniji tossamojaro. ¹²Nadsama tijinedeni timecotedeni japariqquri najari bodideni tossamoridsadsapi pohuadenidsa ima tinanamajaro. Najaropi pina Cristods ima

tinanamanajarossa najaro. ¹³ Ohuapi ajima onajaro: Ojipajarocadsaha ohuemecotedeni ojine imasiri inanamanadsapi ohuara bani huapima ojipapoma-jeranitohui, nahi ohuemecotedeni imasiridsa onehedimabaquui-jarahijine.

**Jesocristocca dodosse tabaquui
huapima cajiridsamanadsa
naco bica tani**

9 ¹ Tetideni huatoma-manaji. Ohuapi madijacca dodosse ojajerani. Ohuapi Jesocristocca dodossena ojajaro. Ia Medsede Jeso naco qqui onade. Najari pohuana ohua cadossedsa tiadeni mari ocanabaquidsapi pohuadsa tiquejenajarode. ² Imecote ohuahadeni mota attidenipa: –Pablopa Jesocca dodosse jarahi –quiquinanaraha tiadenipi ohuadsa: –Pablopa Jesocca dodosse –titiquina nanijine bica tani. Diocca tiquejenajarojinea Jeso ohua cadossejaricca ima ahuato tajaropaji.

³ Madija ohuadsa atti atti quinaridenidsapi ohuatti ajima najaro: ⁴ Ohua Jesocristocca dodosse ojajaro ojipanijinepi ohuemecotedeni ohuadsa dsamatapa, dsedse naha da quinahi ¿bica taqui? Jehe, bica tani. ⁵ Nadsama amoneje Diosda pajissa najaro ocajidsa naqui ¿poni tadsajani Dio Atti maride icadaridsani bica taqui? Bica tani. Pina imecotedeni ohuaha Jesocristocca dodosse tabaquuisa, ia Medsedecca esodenissa, Pedrossa onani naqui bica taraha. ⁶ Aja pohuadeni naco poccadeni mamari tabaquicca danijidsa madimananaraha ohua Bernabe tedsejepi najaro danijidsa imadi-jerani.

¿Naraha najarodsa imadinijine bica tejeraqui? Bica taraha. ⁷ Aja ¿soldadodenipa taminecca dsinirodsada dsama ecahuamana-jeraqui? Najarodsa dsama ecahuamanajaro. ¿Huidsajacca ppa nahi uva cacahuadepa uva bono jijipa najaraco? Jijipa nahi. ¿Edede cacahuade naco edede dsojorini dse dse najaraco? Dse dse nahi. ⁸ Naraha aji huati huati onajarocca imadsa: –Ajijaro dsamacca marinaja –titiquina nanitide. Naraha ajijaro dsamacca imaha ojari-jerani. Diocca dosse-niji Moisesi dsodo inapojaronaqui najaro imassa najaro cajijaro. ⁹ Aji Moisesijine Dio Atti dsodo nanidsa ajima najaro: –Aroso jidsadsa trigo nocco catojahijine bohui ttai ttai nadsapa bohui bono ssoque tacossamana tajarajo. Pohua naco pocca ttainajadsa jipahijine –napohui nade Dio. Naraha ¿Diopa bohuidsara bodi huatojarico? Bohuidsajarahi. ¹⁰ Najaro imapi itohui bodi huatodsada huati huati tajari. Najaro imassa najaropi madija huidsajadsa nocco dappo inadsapa, madija ohuaha bono pore inadsapa mota pohuadenidsa tojahijine dsepedeni ihijimana najari. ¹¹ Ijine Jesocristo tahimari tibodidenidsa tojararopi pina nocco dappo inajarissa najaro. Nadsapa dappo inadsapa bono naco pore inahi bica tahi. Najarossa najaroda tidsepedenitaji ticajimananica mota iadsa da tiquinani bica tani. ¹² Aja Dio Atti mamaride ohuahadenipa poccadeni madiejine ticcadeni da naquinanajadsa cacajimana najari. Naraha iana tahide tiadeni mari icanabaquipojarode. Nema nadsapi ticcadeni da naquunanajadsa da tiquinanijine bica

taraha iapi icca madiejine tiadenidsa huati huati inejerani. Tiadenidsa imadidsapi icappiraniccatohui tarabaidsa inajarojine ocasserani eraha nema nehe inahanade. Jesocristo tahimari icassiejeranijinecca tiadeni mari icanabaquijaro tojidsani noppineni nema inajarode.

¹³Tiadenipi nahatoquiri tiquinani: Jerosaredsa jodiodenicca daniji Diodsa dada toquimahuaji dsepedeni ijimanajaridenipa najaro danijidsa mamadimana najari. Najaria aja *Diodsa da tahijinecca huahuanarihuaji dsepedeni ijimanadsapa aja Diodsa da quinajaricca dsamatapa mota, bani motapa pohuadeni naco jijipamana najari. ¹⁴Najaro imassa najaro ia Medsedecca dosse-niji. Pocca dodosse tabaqqi pohua tahimari icassiejeranijinecca maride dsepedeni ijimanadsapa poccadeni mamari tabaqqicca da naqqinajadsa madimanahijine huati tajari. ¹⁵Naraha ohua Dio Atti maride ojararopi manaconitohui onaridsa-jerade. Najaroa jidapana naqui ticcadeni da naqqinajatohui dsodo onejerani. Aji manaconi jirehe Dio Atti maride ojararopi occa huatidsehe. Najaro madijajine tossamo-jeranijinepi tahide pemi ohuatianina bica tani, onajaro.

¹⁶Ohuapi Jesocristo tahimari icassiejeranijinecca ohuacomera-ridsajaropi ohuatidseda: –Ohuana bica onajaro –onejerajaro. Jeso ohua cadosseda pohuadsa odsepe ijijaro. Pocca dossenijidsa ibo onadsapi oppinehe ohuadsa ssonarirana, onajaro. ¹⁷Nadsama ohua tohuini onadsa Jesocristo tahimari maride ojadisapi: –Odsepe ijijaro manaconi –onanitohuiraha. Dio

Pohuana ohua tocattejidssada ohua cadossejaride. Nadsama pocca dosseniji ohuadsa bica teje, bica teжере naraha onebonijine ssamo tani. ¹⁸Nema onadsapi ¿nejecora manaconi ocajinijine? Aji Jesocristo tahimari icassiejeranijinecca ohuacomera-ridsadsapi manaconi jirehe mari ocanabaquijaridsana ohuatidsejaro. Najaro huatidsehepi pina occa marinaja manaconissa najaro. Odsepe ijijaro manaconi ohuadsa da quinanjine bica taraha najaro tohuini onejerani.

Diocca daniji bicani iadsa tojanijine dissessera inana

¹⁹Ohuapi madijacca dodosse ojarerani. Poccadeni dossenijidsa naqui odsepe ijijerani. Naraha madija denima Jesocristodsa toquejenahijine odsepe ijidsapi ohua ojine pina poccadeni dodossessa onajaro. ²⁰Occa madija jodiodeni Jesocristodsa toquejenahijine pohuadenidsa occaridsadsapi pina pohuadenijinessa onanajarode. Pohuadenipa Moisesicca marinajadsa toquejenaha madimanajari. Naraha ohuapi Jesocristojine Moisesicca marinajadsa omadi-jeraraha pohuadeni maride omadidsapi Moisesicca marinajassa onanadsa pohuadeni acco ocamabaquijari, Jesocristodsa toquejenahijine. ²¹Nadsama madija ohuaha Moisesicca marinaja ssamoquiri najarideni mari ocana-baqquidsapa pina pohuadenijinessa onanajarode. Moisesicca marinaja jirehe omdiridsajaro, Jesocristodsa toquejenahijine onadsa. Naraha ohuapi Diocca dosseniji onebo-jerajaroa aji Jesocristocca marinaja ohuacahuajaropaji. ²²Nadsama aja

imecotedeni Jesocristodsa jehe quinaraha poccadeni jeheniji japari tajarodenidsa occaridsadsa naqui pina pohuadenijinessa onanajarode, Jesocristodsa toquejenahissa tahijine onadsa. Aji occa ima pina pohuadenijinessa onanani onajaropi aja madija huapima bodideni acco ocamaridsa-baqquihijine. Madija tocassiejeraja camahijine tohuini onadsa. ²³Nadsama aji occa madie nema onaridsajaropi Jesocristo tahimari icassiejeranijinecca madija huapimadsa tojaridsanijine, pocca ima bicani ohuadsa naqui tojanijine tohuini onajaro.

²⁴Nadsama tiadenipi nahato-qquiri tiquinani: Madija ittomedsa domo toccadsapa ojaria jicaqquini-huaji bacco tapojarina deni tojajari. Najarina ittome cacahuadecca daniji cajijari. Nadsapi tiadeni naqui daniji bicani ticajimananijine joppa tiquinaji, onajaro. ²⁵Aja madija ittometohui tahide najoramanapodsapa pohuadeni nattome quinapojari. Pohuadeni assire dacoraqquiri nahijine tabaccora tanicca inebo-manadsa pohuadeni cacahuamana-hissa tajari. Nama quinajaripa

ittomedsa deni toquejenahijine tohuini quinajari. Naraha deni tojajaridsa totaticca bebe appani cohuanira da quinajaro. Najaropi jicaca taniccaraha iapi Diocca daniji jicaquera tanicca icajinijine dissera-qquiri inajaro. ²⁶Nadsama ohuapi pajimaranihuajira joppa onejerani. Diocca daniji ocajinijine paji joppa onarini dsanapojaro. Pina madija ittome onihidsa pohua tesse tedseje do caniredsa pohuama do, dsori, do, dsori najarissa onejerajaro. Ohuapi Dio Atti madijadsa onapajiranissa tajaro. ²⁷Ohueme ohuadsa ibora tanijine pina ohua odaqquinjaro-ssa najaro. Diocca daniji bicani cajimanahijine madija mari ocana-baqquiridsaraha ohua ohuacahuani-ssa tejeradsapi Diocca daniji bicani dsori onarana.

**Siba nahatonidsa
huahuatidsemana
najaripa bica tejerani**

10 ¹Ohuemecotedeni, tetideni ajimamana tejeraji: Maitta-ccadsama icca idideni Isaraeri potemahidenipa dsama huamoni ssono caji, siba caji tanihuaji



jahiridsadsa Djojine meme essen
 dopanidsa jahiridsajari. Coridsa
 imeni onini Macconi quiquinanjari
 Djojine carobedsa naco huapima
 jai tojeqquimajari quinade. ²Aja
 Moisesi pohuadeni cacahuade
 tojadsa pohuadsa toquejenajarideni
 meme essen dopanidsa jahiridsa-
 dsa, coridsa jippehuaji naco jai
 tojeqquimadsapa Moisesi tedseje
 totopa cajimanajarissa quinajari.
³Dsamatapa naco huapima Dio-
 cca danijidsa jiparidsamanajari.
⁴Passo naqui Diocca daniji. Sibadsa
 qqunenajaro dse dse naridsamana-
 jari. Najaro sibapi Cristo. Pohua
 qqui toquina-jararaha pohuadeni
 ecahuabaqqui-ridsajari. ⁵Naraha
 najarideni mota huapi taha pohua-
 denijine Diodsa bica tejeradsa Dio
 Pohuajine jicajari. Dsama huamoni
 ssono caji, siba caji tanihuaji
 assiredeni poponeri naridsajaripaja
 quinade.

⁶Nadsapi najaro imaha ia mari
 tocanabaqquijaro, iapi pina aja
 pohuadeni ima tabaccora tajaro
 tohuini quinajarissa inejeranijine.
⁷Tiadenipi dio pohuamaccadsa
 tetidsemana-jeraji. Ajana, poccadeni
 nahatonijidsa huahuatidsemana
 najaridenipa pina Dio Atti dsodo
 nanidsa dsodo napojarossa quina-
 jari: –Madijadenipa jassi taridsadsa
 jipade toquejena, dsede toquejena
 nadsapa dsobide toquejena nanaja
 najari –nani nade Dio Atti
 dsodo nanidsa. ⁸Ia huapimapi
 huananeheda iquejena-gerana.
 Ajana, pohuadsa huananehe-
 dsa toquejenadsapa Djojine 23 mil
 naha amadsati jicajaripaja. Pina
 pohuadenissa inejeranijine, onajaro.
⁹Iapi Cristo nattome inajarana.

Ajana, pohuadenipa jamimanadsa
 Dio nattome quinajari. –Diocca
 najidsohue iadsa nohueranitude
 –quinaraha Djojine motapa macca
 cca cca idseri nadsapa jicajaripaja.
¹⁰Paji, tedimanadsa ponima Diodsa
 atti atti tiquinejeraji. Ajana, icca
 idideni Moisesidsa nacasseraqqui
 nadsa atti quinadsapa Diocca
 dodosse madija nanajicade ccarona-
 dsa inajicaridsajaripaja.

¹¹Najaro ima icca ididenidsa
 tojajaro huapimapi ia icahattera-
 nijine. Maittaccadsama Dio Atti
 dsodo quinapojarideni icca idi-
 denicca ima dsodo quinapojaropi
 poccadeni imadsa ibodi huato-
 nissa tanijine. Pina poccadeni
 imassa inana-geranijine. Najaro
 imapi dsama jicani tohuajiranicca
 huajanodsa imadijarodsa bacco
 najonajaropaji. ¹²Nema nadsapi
 tettidenia: –Icca jeheniji dacorani.
 Iedima-geranitoahui –tiquinanitude.
 Nema tiquinaraha paji, tiedima-
 manarana. Imasiri tinanamana-
 jeranijine tiadeni tecahuamananissa
 taji, onajaro. ¹³Imasiri inananijine
 ibodidsa ahuatoparopi madija
 huapimadsa najarossa naridsajaro.
 Nadsama tiadenipi nahatoqqui
 tiquinaji: Pajissa Diopa tibodi-
 deni acco tocamabaqquihitohui.
 Imasiri dacoraniccadsa tiejidsa-
 mananijine tipajirama-geradsapi
 Diona ecossaponitohui. Imasiri
 tinanamananijine ahuatodsapi
 tiedimamanana-geranijine Dio tiadeni
 tonadacora-baqquihitohui.

¹⁴Nema nadsapi tiadenidsa
 ohuati huana tadsa huati onajaro:
 Ohuemecotedeni, aja siba nahatoni-
 dsa huahuatidsemana najarideni-
 dsa tiajimanani naji, onajaro. ¹⁵Aji

tiadenipi ima mittade nahatoqquiri tiquinani onadsapi tiadenidsa huati onajaro. Occa marinaja ¿bica taqui? ¿bica tejerahui? Tibodidenidsa nattome tiquinaji. ¹⁶Aji Jesocristo-cca jipacquiecca dsedse equididsa Diodsa: –Epejeni, ticca daniji bica tani –inadsa dse dse ihinanajaropi pohua emene toccajaricca imadsa huapima ijariquijaro. Aja pan icanaroberidsadsa ihijipa najaropi pohua pohua ime ccaccorajaricca imadsa huapima ijariquijaro. ¹⁷Iapi huapi inaraha pan ojariadsa ijipacquijarojinea itassaquijaro. Pina essire ojarijarossa inajaropaji.

¹⁸Nadsama Isaraeri potemahi jodiodenicca imadsa naqui tibodideni huatomanaji. Ajana, bani Diodsa da quinahicca jipamanadsapa najaro imadsa ojariquimanageri. Najaro imadsa naqui Diodsa huatidsemanajari. ¹⁹Ohuatti nema onajaropi siba nahatonipi dacorehe cajini, onejerajaro. Siba nahatonidsa bani da quinahicca naco pohuama. Dacorehe cappirahi. ²⁰Ohuattipi ajima najarona paji: Madija Diodsa ssamoqquiri najarideni poccadeni daniji siba nahatonidsa da da quinajaripa Satanacca dodosse tocorimedenidsana da da quinajari. Icca Diodsa jarahi. Tiadenidsa huati onana: Tocorimedenicca imadsapi tiquejemamana tejeraji, onajaro. ²¹Ia Medsedecca jipacquiecca dsedse dse tiquinahi natti tocorimedsa da tahicca dsedse dse tiqinanjinepi bica tejerani, oppina tani. Ia Medsedecca jipacquieccsara tijipamanani ojari nanijine. Tocorimedenidsa huatidsemanajaricca jipacquiedsa tijipamananipi bica tejerani, oppina tani, onajaro.

²²Ajina, tocorimedenidsa huatidsemanajarideni tedseje iquejemadsapi ¿ia Medsedede Dio ia tocahadibaquihijine tohuini inajaroqui? ¿Nejecojarina denima dacorajari? ¿Iana Pohuadsa denima dacoraqquiri inajarorane? ¡Nohuerani!

**Itessedsa eti huana
tadsapi pocca jeheniji
inassamo-jeranijine**

²³Madija attidenipa: –Iadsa oppina tanicca nohuerani –quiquinanahi titimittamana najaro. Naraha ohuattipi: Paji, tohuini tiquinanicca motapi tiadeni acco cama-jeranitide, onajaro. Najaro tohuini tiquinanicca tiadenidsapi oppina tejeranitide naraha ticcadeni jeheniji, timecotedenicca jeheniji todacora-jerani. ²⁴Tiadenidsa bica tanicca tojanijinera tibodideni huatomana tejeraji. Madija ohuahadenidsa naqui bica tanicca tojanijine tibodideni huatomanaji.

²⁵Aja bani dadadsa bani da tahicca huapima tijipamanahijinepa bica tahi. –¿Ajajari banipa siba nahatonidsa da quinapojariccaco? –tiquinejeraji. Najaro ima tibodideni huatomana tejerana. ²⁶Aji dsama nemanehipi ia Medsedecca. Ajijaro dsamadsa aniridsajari huapima naco ia Medsedecca. Najaro imapi Dio Atti dsodonanidsa anijaro.

²⁷Nadsama madija ohuaha Diodsa jararaha tiadenidsa: –Jina, occa odsahuaji tijipamanaji –nadsapa jipacquiri tiquinadsa pocca odsahuaji tijipamanani bica tani. Jijipa tiadenidsa da quinadsapa ticappinanageradsa tijipamanaji. Tibodidenidsa:

–¿Ajajari banipa siba nahatonidsa da quinapojariccaco? –tiquinejeraji. ²⁸Naraha madija ohuaha tiadenidsa jipajari attipa: –Ajajari banipa siba nahatonidsa da quinapojariccha –nadsapa tijipamana tejerana, nahi pohua atti timittamanani ahuato taniijine, pohua naco tijinedeni bodi jabojo najarahijine. ²⁹Najari bani tijipamana-jeraji onajaropi tibodideni jabojo nanijine jerani. Titessedeni bodi jabojo narana onadsa tiadenidsa huati onajaro. Obodipi: Jesocristojine huapima ohuadsa toppineradsapi ¿nejecotohui ohuemecote ohuadsa: –Tijine bica tejerani –nahijine? ³⁰Ohuapi ojipabote nadsa Diodsa: –Epejeni, tijine bica tani –onadsana ohojipa najaro. Naraha ¿nejecotohui ohuemecote ohuadsa: –Najari tijipadsapi bica tejerani –najari? ³¹Naraha tiadenipi ajima tinanamananina bica tani: Tijipamanadsa, dse tiquinadsa, tidsepedeni iimanajarodsa naqui Diocca biquehe, pocca deni tojehe madijadsa ahuato tinanamanaji, onajaro. ³²Madija ohuahadenidsa ticcadeni madie tabaccora tinanamana-jeraji. Jodiodeni, jodio quejena-jarajarideni, Diodsa quequeriquimana najarideni naco ocasserani tinahuabaquimana tajarajo. ³³Ohuapi ajima onajaro: Madija huapimadsa ima bicani onananijine dissera onajaro. Ohuadsara bica tanicca tojanijine tohuini onejerani. Madija ohuahadenidsa naqui bica tanicca tojanijine. Pohuadeni naco Jesocristodsa toquejenadsa tocassiejerahijine, onajaro.

11 ¹Nadsama tiadenipi pina aji occa madiessa tinanamana. Ohuapi Cristocca madiessa onananijine dissera onajaro. Najarossa tiquinaji, onajaro.

Diodsa quequeriquimana nahihuaji amoneje tatinideni teppe quinaniijine

²Jehe ohuemecotedeni, ohuadsa tetideni ajimamana-jeradsapi occa marinaja tecahuamana-dsanapojaroline tiadenidsa ohuatidsejaro. Tijinedeni bica tani, onajaro. ³Nadsama ajijaro ima naqui nahatoqqiri tiquinaji, onajaro: Aja Cristopa maquidejedenicca tamine. Maquidejedenipa poccadeni amonejicca tamine. Diopa Cristocca tamine. ⁴Nadsama maquidejedenipa Diodsa huati toquinahijine, pohuadeni bodidsa Dio Atti ahuatodsa huati iquimananijine naqui tatideni teppe nadsapa bica tejerani. Tatideni teppe nadsapa Cristo ajamani inamanajari. ⁵Amonejedeni naqui aji titiqueriqui nanidsa Diodsa huati toquinaniijine, ponideni bodinidsa Dio Atti ahuatodsa huati iquima-mananiijine naqui tatinideni teppe nejeradsapi bica tejerani. Ponidenicca maqqi ajamani inabaquimanajari. Diodsa quequeriquimana nahidsa tatinideni tepperani huati huati toquinadsapi pina tatinideni conani beri canehe ccohua tajarossa najaro. ⁶Amoneje poni tatini teppede jipera tadsapi tatini conani beri ticanamanehe ccohua taji. Naraha amoneje attinipi: –Otati conani beri canehe ccohua tanipi oppina tani –nadsapi poni tatini teppe nadsana bica tani, onajaro. ⁷Naraha maquidejepa pohua tati teppe najarana. Diojine maquidejepa pina Pohuassa inanjari, dosseniji cajijaripaja. Diocca deni tojehepi maquidejedsa ahuato

tajaro. Naraha amonejedsapi ponicca maqquicca deni tojehe ahuato tajaro. ⁸Dio maqquideje inahatopojaripa amonejedsa inahato-jarahi. Amonejena maqquidejedsa inahatojaro. ⁹Dio maqquideje inahatopojaripa amoneje bijini accode tojahijine jarahi. Amonejena maqquideje biji accode tojanijine inahatojaro. ¹⁰Nema najaroa amonejedenipi tatinideni teppe teppe quiquinanajaropaji. Najaro totati teppe teppecca imapi Diocca dodosse tabaqqui memehujicca naco nahatoqquri nahi. Amonejedeni tatinideni teppe nadsapi: –Icca maqqupa ia cacahuade –quinani ahuato inanamajaro. ¹¹Naraha ia Jesocristodsa iquejenajaro maqquideje nohueraadsapa amoneje nohueranitoahiraha. Amoneje nohueradsapi maqquideje nohuerahitoahiraha. ¹²Aji amoneje maqquidejedsa nahatopojaropi pajissa. Naraha ajijaro ima naqui pajissa: Maqquideje dsotodedeniccapa amonejedenidsa tossonamanajonajaria ajijaropaji. Ajijaro dsamacca huapimapa Dio Puhana tahidedsama inahatoridsapojari.

¹³Jari, tiadenipi ¿nejecoma tiquinani? ¿Amoneje tatini tepperani Diodsa huati huati tadsapi bica taqui? Tibodideni huatomanaji. ¹⁴Naraha iapi ibodidsa nahatoqquri inajaro: Maqquideje tati cone dequeradsapa: –A, jidsa tahi –ihinanajaro. ¹⁵Naraha amoneje tatini conani dequequerasapi: –A, tatini conani bica tani –ihinanajaro. Nadsama aji amoneje tatinideni conani dequejaropipi Diodjine nema quinajaro. Najaropi pina ponideni tatini teteppessa najaro. ¹⁶Naraha madija ojaría, pama itide

najaro imadsa jehe najaradsapa apajana. Puhara nahato tana. Diodsa quequeriquimana nahihujicca huapima ia naqui najaro imadsa jehe inajaro.

**Jesocristocca jipaqueie
pohuadenijine totabaccorajaro**

¹⁷Jidapapi ticcadeni ima onihi tiadenidsa dsodo onajaro. Najaro ima omittadsapi ohuatidsejerani. –Jehe, tijinideni bica tani –onejerani. Najaro ticcadeni imapi ajima nani: Aji Diodsa titiqueriquimana najaropi bica tanijineraha tijinidenina totabaccorajaro. ¹⁸Tahidecca ticcadeni imapi ajima najaro: Ohuadsa huati huati quinahi omittajaropi aji tiqueriquimanasapi tiadenira tiadenira tataridsamana najaro. Najaro ima motapi pajissa nitide, onajaro. ¹⁹Jehe, nadsama tiadeni mota tiadenira titiqueriquimaneri naridsani bica tejeraraha nema tiquinadsapi Dio jipa tahicca tinamananehe timadimanani huapimadsa ahuato tanitohui. ²⁰Nadsama aji tiadenira tiadenira titiqueriquimana nanidsa titijipamana najaro jipaqueiepi pina ia Medsede Jesocristocca jipaqueie-ssa nejerani. ²¹Jipaqueietohui ticcadeni dsamatapa teteccajonamana naraha ¿nejecotohuira tiadenipi ticcadeni dsamatapa titijipamanapojaro? Timecotedeni mota dsamatapa accoqquri nadsapa titesedeni mota pepemimana najari. Dsedse naqui timecotedeni mota pohuadeni idimanadsapa noccodeni janoqquri nanaja najaripaja. ²²Aji jipehetohui dseniji tohui tiquinadsapi ticcadeni odsahuajina jipaniji tiadeni idimana, dseniji tiadeni idimana

neneje naji. Tiadenipi pina Diodsa quequeriquimana najarideni ajamani tinanabaquimanajarissa tiquinajaro. Cappiramanajarideni naco tijinedeni cacappinamana najari. Nadsapi tiadenidsa ¿nejecoma onapadseje? ¿Tiadenidsa: –Jehe, bica tani –onanijinequi? ¡Nema onejeranitohui!

Ia Medsedecca jipaquie

Mateo 26.26-29; Maraco 14.22-25;

Roca 22.17-20

²³⁻²⁴ Ohuemecotedeni, ia Medsedecca jipaquiecca ima timittamananissa tanijine tiadenidsa huati omanipomajaro. Aji tiadeni mari ocanabaquijaropi ia Medsede Jeso pocca mamari tabaqqi mari icanabaquipojari ohuattajarode. Aja ia Medsede Jeso Joda pohua eccorahicca dsomedsa jipade toquejenadsa pan idi nadsapa Diodsa

huati tajari: –Jehe Abi Dio, ticca daniji iadsa bica tahi –napodsana pan icanarobedsa pocca mamari tabaqqidsa huati tajari: –Ajaropi ohueme. Titohuideni ohua ohuaccoradsa odsoqquenijine. Nidsa ohua nohue ojiradsa naqui ohuadsa tetideni ajimamana nejeranijine nema titidsanapomana nana, onajaro –najari Jeso. ²⁵Nadsa ajarideni jicadsapa dse naridsamanahijine dsedse bodi cajih equidi nadsa pohuadenidsa huati tapomajari: –Ajajari dsedsecca imapi *Dio madija tedseje jehe canirehijinecca ima dsati tojanijine. Nidsa ohua odsoqquedsa ohuemene toccadsapi najaro jehe canireniji dsati pajissa tojanitohui. Aji ohuemene toccajaropi tiadenidsa ima bicani tojanijine. Nadsama aja dsedse tiadenidsa da ocanajaripa nidsa ohua nohue ojiradsa tiadenira naqui



dse dse titidsanapomana nana, nani otohui tetideni ajimamana nejera-nijine – najari Jeso. ²⁶Nadsama aja ia Medsede Jesocristo dsoqquehicca ima eti ajima-jeraniijinepi pan apa apa ihinanajari, dsedse naco dse dse ihinanajaripaja. Nema inanadsapi pohua dsoqquehicca ima ahuato inanadsanapojaroa pohua ccanihi bacco inanijine, onajaro.

**Ajima inanadsana Jesocristocca
jipaquie ijipani bica tani**

²⁷Nadsama ia Medsede dsoqquehicca ima eti ajima-jeraniijinecca pan pohuama ijipadsapa Jeso imedsa imasiri inanajaro. Dsedse naco pohuama dse inadsapa Jeso emensadsa imasiri inanajaro. ²⁸Nema inejeraniijinepi ia Medsedecca jipaquiedsa ijipa-jeraccadsama dse inejeraccadsama tahide ibodidsa icca ima nattome inapodsana bica tajaro. ²⁹Nadsama ia Medsedecca jipaquiedsa naqui pohua pohua ime ccaccorajaricca imadsa eti huatopodsapa ijipadsapi bica tani. Najaro ima ibodi huato-jeradsa apa inajari, dse inajari nadsapa Dio ia najidso tahi. ³⁰Aja titessedeni motapa pohuama jipamanajari, dse quinajari najarojinea comaqquiri naja, ocasseraquiri naja, dsodsoqqueri naja camajaripaja. ³¹Naraha iapi ijipa-jeraccadsama tahide ibodidsa icca ima nattome inapodsana bica tajaro. Nadsama ima icajidsapi Dio icattemanijine Pohuadsa ecomerapodsapa ijipadsana bica tani. Nema inanadsapi ia Medsedecca najidsohue iadsa nohueranijine. ³²Naraha icca ima bica tejeradsa ia Medsede ia najidsojaripa icahatteranijine.

Nidsa dsotode Diocca najidsohue bacco tadsa naqui dsori icanire-nijine. Ajijaro dsamacca madija Jesocristodsa jehe quina-jarajari-denipa najidsohue jiquejeranihuaji toquejenahitohui. Naraha iapi pohuadenidsa iquejema-jeranitohui.

³³Jehe ohuemecotedeni, ima onihi naqui. Aji ia Medsedecca jipaquiedsa tijipamananijine tiqueriquidsapi: – Ohuaha ojipapona – tiquinejeraji. Timecotedenitohui timadimanaccana, nani huapima paji tijipamanarini nanijine, onajaro. ³⁴Nadsama madija pemidsapa pocca odsahuaji jipapona, onajaro. Tijinedeni ia Medsedecca jipaquie bica tadsapi Dio tiadeni tonajidsobaquijarahitohui.

Nadsama nidsa nanihuaji tiadeni qquide occadsana tiadeni tedseje ima onihi ocattemanitohui, onajaro.

**Dio Pohua Corimecca
nahatohue da inaridsajaropi
onih onih naridsajaro**

12 ¹Ohuemecotedeni, aji ima onihi ohuadsa dsodo tiquinajaro jidapana tiadenidsa ohuacomeranijine. Jesocristodsa tiquejenajarodenidsa Dio Pohua Corimecca nahatohue onih onih nehe da inaridsajaro. Najaro ima timittamananissa tanijine onadsa tiadenidsa dsodo onajaro.

²Ticcadeni ima tahidecca nahatoquiri tiquinani: Jesocristocca tiquejena-jeraccadsapi siba nahatoni onih onih naridsajaro-dsa tetetidsemana naccade. Najaro siba nahatonipi attini cappiraraha tohuini disseraquiri tiquinapojarode. ³Nema najaro jidapanana

ajijaro ima timittamananissa taniijine tohuini onajaro. Aja madija Dio Corimecca dacorehe cajijaripa: –Jesopa tabaccora tahi –najarahi. Madija ohuaha Dio Corimecca dacorehe cappiradsapa: –Jesopa ia Medsede –nahijine ssamo tahi.

⁴Dio Pohua Corimecca nahatohue onihi onihi nehe iadsa da inaridsajaropi huapi taraha Dio Corimepa ojarahi. ⁵Ia Medsededsa idsepe ijinijinepi onihi onihi nehe iadsa da inaridsaraha ia Medsedepa ojarahi. Pahuadsara idsepe ijijaro. ⁶Dio pocca dacorehe onihi onihi nehe iadsa da inaridsajaro naqui huapi taraha Diopa ojarahi. ⁷Pohuapa Jesocristodsa iquejenajaro ojari ojari inajarodsa Pohua Corimecca nahatohue onihi onihi nehe da inaridsajaro. Aji iadsa tojaridsajarodsa Jesocristodsa ihiqueriqui najaro huapima acco acco icananijine, onajaro.

⁸*Dio Corimecca nahatohue da inaridsajaro ojariepi Jesocristodsa toquejenarideni mota Pohuajine bodideni nahatoquiri najari. Diocca ima madija mittamanahissa tahijine huatide pajiramanahissa tajari.

Nahatohue onihi ohuahadenidsa da inaridsajaropi Pohuajine bodidenidsa ima ahuato tadsa huati huati toquinajari.

⁹Nahatohue onihi motadenidsa da inaridsajaropi jehenijirideni denima daco torani najaro.

Nahatohue onihi ohuahadenidsa da inaridsajaropi madija inanomi-baquiridsamanajari.

¹⁰Nahatohue onihi motadenidsa da inaridsajaropi Diocca dacorehema *canahatorimana canajari.

Nahatohue onihi motadenidsa da inaridsajaropi Dio pohuadenidsa huati tadsapa Pohua Atti *huati iquimaridsa-manajaro.

Nahatohue onihi motadenidsa da inaridsajaropi Pohuajine bodidenidsa ima pajissacca, maidsehecca nahatoquiri najari. (Pina madija canahatori canahi qqui toquinadsa nahatoquiri nadsapa: –Najaropi Dio Corimejine jerani –quina tahi. Madija ohuahacca nahatohue qqui toquinadsa naco bodideni nahatoquiri nadsapa: –Najaropi Dio Corimecca dossenijia –quina tahi.)

Nahatohue onihi motadenidsa da inaridsajaropi Dio Corimejine *tohuatti jidsa tajarodsa huati huati totoquina najari.

Ohuahadeni naco tohuatti jidsa tajaro mittamanadsa Dio Corimejine poccadeni madija attidenidsa huati huati ihiquimamana najari.

Nahatohue onihi motadenidsa da inaridsajaropi Diocca dacorehema canahatorimana canajari.

Nahatohue onihi motadenidsa da inaridsajaropi Dio pohuadenidsa huati tadsapa Pohua Atti huati iquimaridsa-manajaro.

¹¹Ajijaro nahatohue huapimapi Dio Corime jipa tadsa Jesocristodsa toquejenajari motadenidsa da da ihinaridsa najaro. Dio Corimepa ojariraha Pohuana madija huapimadsa inaridsajaro.

Jesocristodsa ijariquijaropi pina essirecca imassa najaro

¹²Nadsama essiredsa huana-ridsanipi huapi tani. (Pina innoco, eribo, itone, itati najaro.) Huapima essiredsa ojariquidsapi ojarie tojajaro. Aji Cristodsa

ijariquijarocca ima naqui najaro-
ssa najaro. Huapi inaraha Cristo
pohua assire ojariassa inajaro.

¹³Nadsama aji ijariquijaro jodio-
deni, jodio jarajarideni, *madijacca
dodosse toquejenarideni, madija-
cca dodosse toquejena-jarajarideni
ia huapima Jesocristodsa iquejena-
podsapi Dio Pohua Corime iadsa
tojaridsajaripaja. Dio Corimejine
huapima Cristodsa ijariquijaropi
pina Cristo pohua assire ojariassa
inajaropaji.

¹⁴Essirepi poni motta jerani.
Mota huanaridsani huapi tajaro.
¹⁵Emori attini cajidsapi ajima
naneje: –Ohuapi todsepe ojajera-
jarojine tohuassirecca ojajerani
–nanitohuiraha. Naraha emorina
essire tohuaccade. Essire nebo-
nijine ssamo tani. ¹⁶Nadsama
eribo naqui attini cajidsapi ajima
naneje: –Ohuapi tonocco ojajera-
jarojine tohuassirecca ojajerani
–nanitohuiraha. Naraha eribona
ima mimitta. Essire nebonijine
ssamo tani. ¹⁷Essire nemanehe
inoccora ojaridsapi tohuatti imitta-
jeranitohuiraha. Essire nemanehe
eribora ojaridsa naqui majo tahicca
jissi inajarahitohuiraha. ¹⁸Aji essire-
dsa huapima huanaridsajaroccap
Dio madija inahatopodsama Pohua
jipa tahihuaji inahanaridsapojaro.
¹⁹Aji essiredsa huanaridsajarora
ojaridsapi essirepi nohueranitohui-
raha. ²⁰Ajjaro imapi pajissa: Essire-
dsa huanaridsajaropi huapi taraha
essirepi ojarijaro.

²¹Nadsama innoco attini cajidsapi
idsepedsa: –Tiapi poni. Ohuana
tohuassire ohuacahuajaro –nanijine
ssamo tani. Aji itati naqui attini
cajidsapi emoridsa: –Tiapi poni.

Totati ohuana bica onajaro
–nanijine ssamo tani. ²²Ajima
najarona pajissa: Essire mota onihi-
dsa: –Japari tani –inaraha najaro
icajidsapi imadinissa tajaro. ²³Essire
mota onihidsa naqui: –Ajimani
tojanicca –inaraha najaropi ia
inabicanijine. Naraha aji essirecca
mota onihi qquidepi oppina tani.
Najaro ecahuanissa tanijine etero
edsadsa ia qquide oppinera tani.
²⁴Nadsama aji essire mota qquide
oppinera tajaropi inajima-jerani.
Essirecca imapi Diojinena nema
najaro. Aji essire ajimani tojajaro
motapi Dio Pohuana inanabicajaro.
²⁵Jehe, essire motapi ponira ponira
naridsa-jerani. Huapima ponideni
cacahuamanani. Essire mota naqui
ponidenira acco acco cana tani.
²⁶Aji essire mota naqui ocasserani
ahuadsapi essire huapima
ocasserani ahua tani. Essire mota
ojarie inanabicadsa naqui essire
nemanehe huapima huatidse tani.

²⁷Nadsama tiadeni huapima
Cristodsa tijariquimanadsapi:
–Cristo pohua assire tiquejenani
–inajaro. Aji ojari ojari taridsa-
manajaropi Cristo assire mota
tiquejenajaro. ²⁸Aja Jesocristodsa
quequeriqqui najaridenicca ima
bica tanijine dsepedeni ijimana-
hijinepa Diona pohuadenidsa inana-
ridsajaro.

Tahide motadenipa Jesocristocca
dodosse tabaqqi toquejenahijine
inanabaqqijari.

Dsotode ohuahadenipa *Dio Atti
huahuati toqquimade toquejena-
hijine inanabaqqijari.

Dsotode ohuahadeni naco Dio
Atti maride toquejenahijine inana-
baqqijari.

Ohuahadenipa canahatorimana canaridsahijine inanabaqqui, comaqquiri najarideni inanomi-baqquimanahijine inanabaqqui, madija bijideni acco camade toquejenahijine naco inanabaqqui najari.

*Jesocristodsa quequeriqquimana najarideni dossede toquejenahijine naco inanabaqqui,

*tohuatti onihi jidsa tajarodsa huati huati totoquina nahijine naco inanabaqqui najari.

²⁹ ¿Naraha huapimapa Jesocristo-cca dodosse tabaqqui toquejenahijineco? Nohuerahi. ¿Huapima Dio Atti huahuati toqqumade toquejenahijineco? Nohuerahi. Huapima Dio Atti maride toquejeha-jarahi. Huapima canahatorimana cana-jarahi. ³⁰ Huapima madija tonanomide nahatohue cajimana-jarahi. Tohuatti jidsa tajarodsa huatide huapima pajiramana-jarahi. Tohuatti jidsa tajaro huati toqqumade naco huapima nahatoqqui najarahi. Aji ia huapima Jesocristodsa iquejenajaropi Djine idsepe ijinijine Pohua Corimecca nahatohue onihi onihi da da ihinaridsa najaro. ³¹ Tienenipi Dio Corimecca nahatohue denima bica taniccatohui disseraqquri tiquinaji, onajaro.

Jidapapi ima denima bica taniccara tiadeni mari ocanabaqquina, onajaro.

Tohuati huanehecca imana denima bica tajaro

13 ¹ Tohuatti onihi huapima huatide nahato onadsa, Diocca dodosse tabaqqui memehuaajicca attideni huatide naqui

nahato onadsapi occa ima Diodsa bica tanijineraha madijadsa ohuati huanera tadsapi occa ima Diodsa bica tejerani. Ohuattipi ponima tojanitohui. Pina beobeo tocatabaccoradsa mohuini jidsa tehe imittajarossa najaro. ² Aji Jesocristo tahimari ohuacomera-ridsajaro naqui nemanehe nahato onadsapi, otedsejemacca ima huapima nahato, tohuattehe huapima nahato onadsapi occa ima Diodsa bica tanijineraha madijadsa ohuati huanera tadsapi ponima nahatohue ocajijaro. Occa ima Diodsa bica tejerani. Occa jeheniji Diodsa dacoradsa ssono pajimaranihuaji toccanijine naqui huati onadsa toccanijine opajiradsapi occa jeheniji bica tanijineraha madijadsa ohuati huanera tadsapi occa ima Diodsa bica tejerani. ³ Aji odsepetaji huapima ocajijarocca naqui tohuati nahanaqquri najaridenidsa da onehe jicadsapi occa ima Diodsa bica tanijineraha madijadsa ohuati huanera tadsapi occa ima Diodsa bica tejerani. Jesocristo tahimari- dsa dissera onajarojine madija ohua inanadsoqqe-mananijine ohuassire ohuaccoradsa naqui occa ima Diodsa bica tanijineraha madijadsa ohuati huanera tadsapi occa ima Diodsa bica tejerani.

⁴ Nadsama tohuati huanehepi ajima najarona paji: Ima iadsa ssonaridsa edijeradsa *mohuaradsa inahana-jaro. Madija tohuattattera tadsa naco huadie jirehe mari icanajari, mari icanapomajari, mari icamanipomajari najari. Huapimadsa bicaqquri inajaro. Amoneje acconi, todsepetaji acconi, tarabadsa acconi naqui itessedenidsa edijerajaro. Ia ettidsa

ia deni inana-jerajaro. Ijine bica tadsapi: –Ohua motta nahato onani ojari onana –inejerajaro. ⁵Tohuati huanehe icajidsapi tohuatti tabaccora tanicca, jidsehe tabaccora tanicca huatira inajaro. Accoquiri inejeranijine: –Ohua mottacca –inejerajaro. Tohuati huanehe icajidsapi huadi inejerajaro. Madija iadsa ima inanamanadsa naqui poccadeni ima ibodi huahuatomacca nejerajaro. ⁶Ima pajiranissa tejeraniccadsa, ima tabaccora taniccadsa etidse-jerajaro. ⁷Tohuati huanehe icajidsapi itessejine bica tejeraraha nema nehe pohuadsa eti huana tajaro. –Itsepe bica tahi, maidsera tahi, madihissa tahi –inajaro. Pohuajine bica tejerani qqui inadsa naqui: –Nidsa pocca madie tobicanitohui –inajaro. Pohuajine ocasserani edsa naqui mohuaradsa inahananijine ipajirani.

⁸Tohuati huanehepi nema dsanaponitohui. Nidsa aji Diojine madijadsa ahuato tadsa huati huati totoquina najaripa nebomanahitohui. Aja madija tohuatti jidsa tajarods huati huati totoquina najari naco jicanitohui. Dio Corimejine tohuattehe cajimanaraha najaro naqui amossi nanitohui. ⁹Dio Corimejine nahatohue onihi onihi naridsajaro motara icajijaro. Nahato inanissa tejerani. Dio Atti huahuati toquimadedeni naco itedsejemacca ima nemanehe nahatoquiri najarahi. Diojine mota pohuadenidsa ahuato tajarora huati huati ihiquimamana najaro. ¹⁰Najaro nahatohue icajipojaro huapimapi nidsa Diojine pajirahissa tahicca ccajonadsapa jicaridsanitohui.

¹¹Nadsama ejedeni ojaponipi ejedenicca imara huati huati

ohonanaccade. Obodi naqui ejedeni bodi huatojarissa onaccade. Ejedeni ijaponicca imara ohocattejidsa naccade. Naraha onapidsa obiji ccaradsapi ejedeni ojaponicca imapi onattihuaji onanaridsehe jicajarode. Ajijaro namidsa imadiccadsapi Diocca ima nemanehe icahatteranissa tejeraccani pina ejedeni ijaponicca imassa inajaro. ¹²Jidapanapi Diocca ima nemanehe imittanissa tejeraccani. Pina pipiridsa icorime qqui inajarossa najaro. Dsidsi tadsapi pipiridsa icorime qqui inaraha qqui inanissa tejerani. Naraha nidsa dsotodena Diocca ima nemanehe qqui inanissa tanitohui. Cristo pohua pano, assirema qqui inahitohui. Jidapapi Diocca ima motara nahato onajaro. Opajiranissa tejerani. Nidsa dsotodena pocca ima huapima nahato onanissa tanitohui. Pina Pohua ohuadsa nocco jidsera tajarissa nanitohui.

¹³Ima bicani jicaquera taniccapi 3 najaro. Ojariepi icca jeheniji. Diodsa pajissa idsanaponitohui. Ima onihipi itedsejemacca ima bicani tohuini imadi-dsanaponitohui. Ima onihi naqui tohuati huanehe nema dsanaponitohui. Aji ima 3 najaropi bicaquqiri naraha tohuati huanehena denima bica tajaro.

Tohuatti jidsa tajarods huatide

14 ¹Tohuati huanehe ticajimananijine disseraquiri tiquinaji. Dio Corimecca nahatohue onihi onihitohui naqui disseraquiri tiquinaji. Pocca nahatohue ojariepi denima bica tajaro. Najaropi aji Dio Corimejine madija bodidsa Pohua Atti ahuatods *huati iquimajaro nahatohuena –Ohuadsa tojana

–titiquina naji. ²Aja madija Diojine *tohuatti jidsa tajarodsa huati huati tajaripa Dio Pohuadsara huatide tojajari. Iapi pohua atti imitta-jera-jaro. Dio Corimejine ima bicani huati huati taraha iadsa ahuatora tani. ³Naraha madija ohuahapa Dio Atti pohua bodidsa ahuatojarocca huati iquimadsapi pohua imecotedenicca jeheniji todacorani najaro, madija ihinahatidsebaqqui najari, madija huatideni ihinassonabaqqui najaripaja. ⁴Nadsama aja tohuatti jidsa tajarodsa huati huati totoquina najaridenipa pohuadeni motta Diodsa poccadeni jeheniji todacorani najaro. Naraha madija Dio Atti huati iquimaridsa-manadsana Diodsa quequeriquimana najaridenicca jeheniji todacorani najaro.

⁵Tiadeni huapima tohuatti jidsa tajarodsa huati huati tiquinanipi ohuadsa bica tani. Naraha Dio Atti huati tiquimaridsa-mananina ohuadsa denima bica tajaro. Najarona ima deni tojanicca. Tohuatti jidsa tajarodsa huatidepi ajimani. Naraha timecote tohuatti jidsa tajarodsa huati huati tadsa pohua atti huati toqqumade anidsapa bica tani. Nahi aja Diodsa quequeriquimana najaridenicca jeheniji todacoranjine. ⁶Ohuemecotedeni, nidsa tiadenihuaji occadsa tohuatti jidsa tajarodsa tiadenidsa huati huati onadsapi ¿tiadeni acco camanjinequi? Acco cama-jerani. Ponimassa nanitohui. Naraha Dio ohuadsa ahuato inanjaro-cca huati onadsa, pocca nahatohue tiadenidsa huati onadsapi najarona tiadeni acco camanitohui. Pohua Atti huati oquimadsa, marinaja bicani tiadeni mari ocanabaqquidsa naqui tiadeni acco camanitohui.

⁷Nadsama totore naqui camittehe cappiraraha mohuinipi ajie totoja najaro. Aja madija tire tire quinaja, tore tore quinaja nadsa naco mohuini jidsa tadsapi ajie mohuini imittanissa tejerani. ⁸Soldado naco jadsirecca jejei mohui mittamandsapa huapima jadsiretohui domo toccahijineraha jejei mohui jidsa tadsapa domo tocca-jarahitohui. ⁹Ticcadeni ima naqui najarossa najaro. Tettideni jidsa tajarodsa huati huati tiquinadsapi ¿nejecoma nadsa tettideni mittamanahijine? Tettideni mohuinipi ponima jojodsa totocca najaro. ¹⁰Aja madija dsama onihicca, dsama onihicca naco huapima attideni caji-manaridsajari. Tohuatti huapima aniridsajaropi ponima jerani. Pohuadeni atti camitterara cacana najari. ¹¹Naraha madija ohuadsa huati huati tadsa pohua atti omittajeradsapi pohua bodipa ohuadsa: –Ajaripa dsama onihicca madija –nahitohui. Ohua naqui pohuadsa: –Dsama onihicca madija –onanitohui.

¹²Nadsapi timecotedeni tedseje Dio Corimecca nahatohue onihionihionaridsajaro tohuini tiquinadsapi Jesocristodsa quequeriquimana najarideni jehenijirideni todacorani nanijineccara –Ocajina –titiquina naji, onajaro. Nema nanicca huemani ticajimananjine disseraqquri tiquinaji.

¹³Nadsama madija tohuatti jidsa tajarodsa huati huati taraha pohua atti tomittani-jaradsapa Diodsa huati tana, nani pocca huatinaja pohua bodidsa ahuato tadsana pohua imecotedenidsa huati iquimanijine. ¹⁴Ohua naqui

tohuatti jidsa tajarodsas Diodsa huatide ojadsapí ocorimema huati huati onaraha omittani-gerani.
¹⁵Najaro imapí ¿nejecoma onanani bica tajaro? onajaro. Naraha bica tanijinepi Diodsa huatide ojadsapí ocorimema Pohuadsa huati huati onanijine, omittajaroccamá Pohuadsa huati huati onanijine. Diodsa jiri jiri onadsa naqui ocorimema Pohuadsa jiri jiri onanijine, omittajaroccamá Pohuadsa jiri jiri onanijine. ¹⁶Tiadeni naqui ticorimedenima tohuatti jidsa tajarodsas Diodsa tetidsemanadsa: –Jehe Abi Dio, tijine bica tani –tiquinaraaha aja timecotedeni tohuatti jidsa tajaro mittamana-jarajaridenipa tiadenidsama Diodsa: –Jehe, bica tani –quinahijine ssamo tani.
¹⁷Aji tohuatti jidsa tajarodsas Diodsa huati huati tiquinani bica taraha najarodsapí timecotedenicca jeheniji todacora-geranitohui, onajaro. ¹⁸Nadsama tiadeni motapí tohuatti jidsa tajaro ticajimanaraha tiadenipi ajimani huati tiquinajaro. Ohuana denima tohuatti jidsa tajarodsas huati huati onajaro. Najarojine Diodsa: –Jehe, *epejeni, bica tani –ohonanajaro. ¹⁹Aja Diodsa quequeriqquimana nahihuaji tohuatti jidsa tajaro 10 mil nehe huati huati onani opajiraraha ohuemecotedeni mittamana-jarahitohui. Naraha aji tohuatti mitta-manahissa tahicca 5 nehera huati onanijinena denima bica tajaro, onajaro.

²⁰Ohuemecotedeni, najaro imadsa tibodideni huatomanadsapí pina ejedeni bodi huatojarissas tiquine-geraji. Tabaccorehe ssamoququiri tiquinana, pina ejedeni tossonedsati

tabaccorehe ssamo tajarissas tiquinanjine bica taraha ima nattomede tiquejenadsapí pina madija jadahi bodi nahato tajarissas tiquinaji, onajaro. ²¹Dio Atti dsodo nanidsapí: –Nidsaranibote occa madijadsas dsama onihicca madija attidenidsa huati onanitohui. Dsama onihicca madijana pohuadenidsa Ohuattí ecomeramananitohui. Naraha najarodsas naqui bodideni huato-jarahitohui. Ohuattissas inanamana-geranitohui –napohui nade Dio.

²²Nadsama najaro imadsa iattajaropí tohuatti jidsa tajarodsas huatidepi Diodsa jehe quina-jararidenidsas pocca ima ahuato tanijine. Najaro imapí jehe quina-jararidenidsas gerani. Naraha *Dio Atti huati toququimadepi Diodsa jehe quinajararidenidsas pocca ima ahuato tanijine. Najaro imapí jehe quina-jarajaridenidsas gerani. ²³Diodsa titiqueriqui nanidsas huapimas tohuatti jidsa tajarodsas huati huati tiquinadsapí madija ohuaha pina tohuatti jidsa tajaro mittapo-jarajari itide, Diodsa jehe najarajari itide, nama najari Dio Atti mittade qquedsimadsas tettideni mittadsapá: –A, ajajarideni madijapa bodideni tossamoridsajari –nahitohui. ²⁴Naraha aji titiqueriqui nanihuaji huapimas Dio Atti huati toququimade tiquejenadsapí madija ohuaha pina tohuatti jidsa tajaro mittapo-jarajari itide, Diodsa jehe najarajari itide, nama najari Dio Atti mittade qquedsimadsas tettideni mittadsapá: –A, ohuapí imasiri ocajini –nahitohui. Nadsapá pohua bodicca ima nattomede tojahijine. ²⁵Nama

nadsapa pohua bodicca ima ecomajarocca pohuadsa ahuatomanitohui. Nahi Diodsa huatidsedsa pohua pitodsa huitta nadsa: –Diopa bica tahi, deni tojahi –nahijine. Diopa tiadenidsa pajissa anih pohuadsa ahuato tahitohui.

Tijinedeni titiqueriqui nanicca mohuaradsa toccanissa tanijine

²⁶ Ohuemecotedeni, aji huati huati onajaropi ajima najaro: Titiqueriqui nahicca madija ajie nahatode nahato tadsapa jiri jiri nahijine. Ohuahapa Dio Atti mari mari nahijine. Ohuahapa Diojine pohuadsa ahuatomsapi ecomeranjine. Ohuahapa tohuatti jidsa tajarodsa huati huati nahijine. Ohuahapa Dio Corimejine tohuatti jidsa tajaro mittadsapa huati iquimanijine. Najaro ima huapimapi timecotedeni huapima jehenijirideni todacorani dsanaponijine, onajaro. ²⁷ Aji tohuatti jidsa tajarodsa huatidepi madija pamaha, 3 quinahitide huati toquinahina bica tani. Denimapi poni. Tiadeni naqui huapima huati huatipi poni. Pina ajima tiquinaji: Madija ojaría huati taha jicadsa manaco ohuaha huati, jicadsa ohuaha huati, titiquina naji. Tohuatti jidsa tajarodsa huati huati toquinadsa naco madija ohuaha najaro tohuatti Dio Corimejine mittadsapa tettidenidsa huati iquimani bica tani, onajaro. ²⁸ Naraha madija tohuatti jidsa tajaro huati toquimade nohueradsapa titiqueriqui nanidsa tohuatti jidsa tajarodsa huati tiquina tejeraji. Tiadeni motta tibodidenidsara huati huati tiquinaji. Diodsa naqui tibodidenidsara huati huati tiquinaji, onajaro.

²⁹ Aji titiqueriqui nanihuaji naqui Dio Atti huati toquimade toquejenadsapa madija pamaha, 3 quinaha naco huatide toquejenahijine bica tahi. Nadsapa taharibomanajaridenipa huati huati toquinahi mittamanadsa pohuadeni bodidsa attideni nattome quinana. Pina: –¿Dio Attissa najaroqui? –quinahijine. ³⁰ Nadsama madija ojaría Dio Atti huati toquimade tojaraha nahidsa huittarijari bodidsa Diojine ima pohuadsa ahuatomsapi huati taccahijine tahideccapa joma naccana. ³¹ Nema tiquinadsa Dio Atti huati toquimade ojari ojari tiquinadsapi bica tani. Nahi Dio Atti tocahatteradsapa huapima catidserara canahijine. ³² Dio Atti huati toquimadenipa pohuadenidsa Diojine ahuatomajarocca mohuaradsa pohuadeni bodidsa ecahuamananjine pajiramanajari. Nama quinahijinepa pohuadeni tesse huatide tojaccadsapa tocadidire naccahijine. ³³ Diopa tohuatti quejemama cansa pina mohuanijissa najarocca jipera tajari. Pohua Atti mohuadsa imittanijinena jipa tajari. Diopa jonehe jinede. Pohuadsa quequeriquiridsa najarideni huapimapa nama quinahijine.

³⁴ Diodsa iqueriquinidsa amoneje naqui atti quina-jeradsa tocadidire naccanijine. Pina Diocca dosseniji dsodo nanidsa anjarossa quinanijine: –Amonejedenipi maquidejedenidsa deni toquejena-jerana –nade. ³⁵ Dio Atti mamaridecca marinaja mittamananissa tejeradsapi nidsa poni-denicca odsahuajina ponidenicca maquidsa huati toquinadsana

mittamananjine. Titiqeriqui nanidsapi amonejedeni atti atti quinani bica tejerani.

³⁶ –Iadsana Dio Atti ahuatomapojarode –çtiquinajaroqui? –Iadsana Dio Atti tojani ojari najaro –çtiquinajaroqui? Nema nejerani. ³⁷Madijapa: –*Dio Atti huahuati toqqumade ojani, Dio Corimejine nahato onani –nadsapa pajissa Dio Corimejine nahato tadsapa pohua bodidsa occa ima ahuaato tanitohui. Ia Medsede pocca dosseniji ohuadsa ahuaato inanadsapi tiadenidsa dsodo onajaro. ³⁸Naraha ia Medsedecca dosseniji dsodo onajarods madija pajissa najaradsapa apajana. Nadsapi pohua atti naqui timittamana tejeraji, onajaro.

³⁹Nadsama ohuemecotedeni, Dio Atti huati toqqumade tiquejenanjine tohuini disseraquiri tiquinaji. Titesse tohuatti jidsa tajarods huati huati tadsa naco tecossamana tejeraji. ⁴⁰Naraha titiqlieriqui nanicca ima huapima tijinedeni mohuaradsa toccanissa tana, onajaro.

Cristo nahatonijaricca ima

15 ¹Ohuemecotedeni, tetideni ajima-jeranjine tiadenidsa huati omanijaro. Jesocristo tahimari icassiejeranjinecca tiadenidsa ohuaccorapojarode. Najaro imadsa jehe tiquinadsapi tinebomana nejerararoa ajijaropaji. ²Aji icassiejeranjinecca imadsa dissesera tinadsapi ticassiejeraropaji. Naraha dissesera tinejeradsapi ponima jehe taridsamanajaro.

³Aji Jesocristo tahimari ohuattapojarocca tiadeni mari ocana-baqquijaropi denima bica tanicca.

Najaropi ajima najaro: Cristopa icca imasiri manaconi dsoqqejari, pina Dio Atti dsodo quinapojarossa najaro. ⁴Cristo huatiadsa ppa idsamanaraha huada 3 nadsapa nahatonijaride. Najaro naqui Dio Atti dsodo quinapojarods nema napojaro. ⁵Nahatonidsapa Pedrosaha ahuatonipojari. Nahi dsotodepa pohua huatimadedeni 12 quinajaridenidsa ahuatonipomajari. ⁶Nahi dsotode naco pohuadsa jehe quinajari 500 quinajari, naraha denima itidija, najarideni huapima queriquimanahidsa ahuatonipomajari. Najarideni motapa ajijaro ima teppe dsodode ojadsa madi-manahipaja naccahi. Naraha mota pamadema nahapa jicaridsapohui. ⁷Nahi dsotode Satiacods naco ahuatonipomajari. Nahi dsotode naco pocca dodosse tabaqqi huapimadsa ahuatonipomajari.

⁸Nahi dsotode jicarihiccapa ohuadsa ahuatonijaride. Ohuapi pina ejedeni pohua tossonahicca huada bacco tajaraccaraha tossonapjarissa onajaro. Ohuapi Jesocristods jehe onapo-jerara ohuadsa ahuatodsana pocca oजारode. ⁹Nadsama Jesocristocca dodosse tabaqqi tahideccapa bicaqqiri naraha ohuapi ajimani oजारode. Tahidepi Jesocristods toquejenajarideni Dio Attidsa totoqlieriqui najarideni ohonajidsobaqqi naccade. Jesocristocca dodosse tabaqqi ojanijine bica onejeraraha Jeso pohuajinena pocca dodosse oजारode. ¹⁰Naraha Diopa ohuadsa bica tajari. Occa najidsohue epeje inanajarode. Ohua catidsedsapa pocca dodosse oजारode. Pocca biquehe naqui ponima

ohuadsa toja-gerani. Najarojinena Pohnadsa odsepe ijinissa tajaro. Nadsama motadenipa ajamani dsepedeni ijimanajari. Naraha ohuana denima odsepe ijijaro. Aji odsepe ijijaropi ojine jerani. Dio ohua acco camadsa odsepe ijiridsa-jaro. ¹¹Naraha: –¿Nejecotarina denima dsepe ijijari? –inejerana. Aji tiadeni mari ocanabaquijaroa aja Jesocristocca dodosse tabaqquideni naco occa marinajassa najaro tiadenidsa mari mari quinajaripaja. Najaroa aji tiadenipi najarodsa pajissa tiquinajaropaji.

**Jicajaridenipa Dio
inahatonibaquihitohui**

¹²Naraha icca marinajapi: –Cristopa dsoqqueraha Diojine nahatonijari –ihinanadsapi ¿nejecotohui tiadeni motaha: –Jicajaridenipa nahatonimanajarahitohui –titiquina najaro? ¹³Nassa nahatonie nohueradsapi Cristo naco nahatoni-jaranaja. ¹⁴Cristo nahatoni-jaradsapa icca marinaja ponima tojanitohuiraha. Ticcadeni jeheniji naqui ponima tojanitohuiraha. ¹⁵Pajissa nahatonie nohueraadsapi icca marinaja aji: –Diojine Cristo nahatonijari –ihinanajaropi Diodsa maidsehe inaneje. Pajissa nahatonie nohueradsapi Cristo nahatoni-jaranaja. ¹⁶Aji tettideni: –Jicajaridenipa nahatonimanagerahitohui –titiquina nadsapi nassa Cristo naco nahatoni-jaranaja. ¹⁷Pajissa Cristo nahatoni-jaradsapa ticcadeni jehenijipi ponima tojaneje. Ticcadeni imasiri naqui tiadenidsa nema dsanaponeje. ¹⁸Nassa najaro ima pajissa tojadsapi aja Jesocristodsa jehe quinajari jicapojaridenipa

paja amossihuajarihi nanaja. ¹⁹Cristo iadsa ima bicani inananijine tohuini imadijaro. Naraha ajijaro namidsara ima bicani iadsa tojani ojari nadsapi pina tohuati nahanaquqiri najaridenissa inaraha iapi denima tohuati nahanaquqiri inaneje.

²⁰Naraha Cristopa pajissa nahatonijari. Pohnapa pina huidsajacca bono tahidecca pore quinapojarissa najari. Cristo tahide nahatonipojarijine madija huapima naco dsotode nahatoniridsa-manahitohui. ²¹Nadsama madija ojariacca imajine ajijaro namidsa dsoqqehe madijadsa tojajaro. Madija ojariacca imajine naqui madija dsoqqemanageridenidsa nahatonie tojajaro. ²²Adana potemahi iquejenajarojine ihidsoqqe najaropaji. Cristodsa iquejenajaro naqui idsoqqueraha pohnajine imadipomanitohui. ²³Naraha iapi dsotode iquejenajaro. Cristona tahide nahatonipojari. Nidsa Cristo ccanipomadsapa ia huapima pocca iquejenajaro inahatoniridsanitohui. ²⁴⁻²⁶Nani dsotodepi ajijaro dsama jicanicca ima tojanitohui. Nadsapa cacahuehe cajimana, dacorehe cajimana, nahatohue cajimana najarideni huapima Cristojine jicaridsahitohui. Cristo deni tojadsapa poccadeni dacorehe naqui inajicanitohui. Nadsapa pohna memehuaicca, namihuaicca huapima dossedde tojahitohui. Huapima ecahuabaquid-sanapojaria pocca huadideni huapima ajamani inabaquihitohui. Pocca huadi jicahicca inajicadsapa madija denima dsoqqemanagerahitohui. Najaropi

dsosquehe jicajaro. Nadsapa Cristo pocca Abi Diodsa pocca cacahuehe da inanitohui. ²⁷Diojine Cristo deni tojadsapa huapima ajamani toquejenajari. Pina pohua amori bacconihuaji toquejenajarissa quinajari. Naraha najaro ima timittamanadsapi: –¿Dio naco Cristodsa ajamani tojararico? –tiquinanitidija. Nohuerahi. Pohuajinena huapima Cristodsa toquejenajari. ²⁸Diopa huapima Pohua Bedi Cristodsa iboraquiri inana-baquidsapa Cristo naco Imehi Diodsa ibora tahitohui. Jehe, Diojinepa huapima Cristodsa toquejenajari. Nadsapa Diodsa huapima iboraquiri najari. Pohuana dosse dosse nahi ojari najari.

²⁹Nahatoniecca ima denima huati onana. Aja timecotedeni motapa poccadeni madija totopa jiraha jicajari onidenidsa totopa cajimanageraha ¿nejecotohui nama quinajari? Pajissa madija nahatonimanajaradsapa nassa totopa jiraha jicajarideni naco nahatonimana-jaranaja. Nadsapa pohuadeni onidsa totopa cajimanajaripa ponima.

³⁰Ia naqui ¿nejecotohui oppinehdsas imadiridsajaro? Nassa nahatonie nohueradsapi ponima oppinani eridsaneje. ³¹Ohueme-cotedeni, pajissa huati onajaro. Ohuapi huada huajijiradsa oppinehe onihi onihi onahanaridsajarojine odsoquebote naridsajaro. Najaropi pajissa, pina pajissa tiadeni ia Medsede Jesocristodsa tiquejenadsa ohuatidsejarossa najaro. ³²Aji Epesodsa omadidsa naqui odsoqueniijine madija otohui inacomaridsamanajaro, pina dsomaji huadi tajarissa quinahi.

Pohuadenidsa Dio Atti maride dissera onaraha poccadeni huadie onahanani manaconi ¿nejecora ocacijaro? Jicajarideni pajissa nahatonimana-jaradsapa ponima maride ocasserani ohuaridsaneje. Nadsapi aja madija ohuaha attideni: –¡Jari, ijipana! ¡Dse inana! Dsemassa onihi ijicadsapi nemarade –quiquinanajaridenissa inana. ³³Paji, madija attideni nama nama quiquinanajaridenipa tiadeni tocamaidsabaquui-manarana. Aji ima titimittamana najaropi: –Madija madiere bica tajarajari titesse tojadsapa ticca madie bicani amossi nanitohui –quiquinanajari. ³⁴Tibodideni huatoma-mananissa taji. Ticcadeni imasiri naqui tinebomanaji. Diodsa ssamoququiri najarideni tiadenidsa animanahi. ¿Najaridenijine ticomehimana-jeraqui? onajaro.

Essire inahatoninicca imapi ajima najaro

³⁵Tiadeni motapi ajima tiquinanitide: –Jicajarideni nahatonimanahijinepa ¿nejecoma quinpadsaja? ¿Assiredeni naco nejecoma najarora cajimanapadsaja? –tiquinanitidija. ³⁶Apaja, tiadenipi ¿ssamoququiri tiquinajarorane? Jari, dsamatapa nocco tahimari-dsa tiadeni mari ocanabaququina. Dsamatapa nocco ppa todsajaripa nahi namidsa jadsiraha moro tajarina assire dsati tojarari. ³⁷Tapa-tohui inadsapa ede ppa ppa inajarajari. Noccona dappo dappo inajari, moro tahijine. Dsamatapa ohuaha nocco cajiridsajari naco najarissa naridsajari. ³⁸Nocco assirepa pohuara pohuara naridsajari, pina

Dio Pohua jipa tajarissa inanajari. Dsamatapa moro tajari naco Djojine assire ohuaha ohuaha cajiridsajari. ³⁹Namidsa madimanajari assiredeni naco huapima najarissa naridsa-jarahi. Madijapa assire ohuaha. Bani assire ohuaha. Bani eppe cajihi assire ohuaha. Aba naco assire ohuaha naridsamanajari. ⁴⁰Meme-huajicca naco huapima assiredeni cajiridsamanahi. Aja namihuajicca naco huapima assiredeni cajiridsamanahi. Aja memehuaajicca biquenedeni ohuaha. Aja namihuajicca naco biquenedeni ohuaha naridsamanajari. ⁴¹Maji ssiejenepa pina abadsico ssiejenessa najarahi. Abadsico ssiejene naco abadsico bedi ssiejenedenissa najarahi. Abadsico bedi ssiejenedeni naco ohuaha ohuaha naridsajari.

⁴²Nadsama ia naqui nema inanitohui. Idsoqquedsa inahatonidsapi essire onihi dsatira icajinitohui. Idsoqquedsa essire ppa idsamanajaropi totabaccorara tanicca. Naraha inahatonidsapi essire totabaccorara taniccana tojajaro. ⁴³Etiadsa essire ppa todsani jadsidsapi tohuajari nadsa tehe toja tani. Naraha inahatonidsapi bicanira tojanitohui. Ajijaro namidsa imadijarocca essirepi dacore-jerani. Naraha inahatonidsapi essire dacoranitohui. ⁴⁴Aji essire ppa ppa todsajaropi ajijaro namidsa imadijarocca. Naraha essire nahatonijaropi Diohuaji imadinijinecca. Dio madija assire namidsa madihijine inahatodsapa memedsa madihijinecca naco inahatojari.

⁴⁵Dio Atti dsodo nanidsapi ajima najaro: –Tahidecca madija Adanapa namidsa madihijine Djojine camitta

tajari –nani nade Dio Atti dsodo nanidsa. Naraha aja Cristo pohuada: Adana jicarihicca ihinanajaro pohuana memehuaaji madihijine pajirajari. Pahuapa camittehe jiquejeranicca da inajaro. ⁴⁶Essire tahideccapi memehuaaji imadinijinecca jerani. Essire tahideccapi namidsa imadijarocca. Dsotodeccana memehuaaji imadinijinecca. ⁴⁷Tahidecca madijapa ssiqui nahatojari, namidsa madijari. Dsotodecca madija memehuaajicca Cristo. ⁴⁸Ajijaro namidsa essire imadijaropi pina Djojine ssiquidsa madija inahatopjarissa inajaro. Nidsa memehuaajipi essire pina memehuaaji madijari Cristossa inanitohui. ⁴⁹Jidapapi pina madija ssiqui nahatojarissa inajaro. Nidsa dsotodena pina Cristo memehuaaji madijarissa inanitohui.

⁵⁰Ohuemecotedeni, tiadenidsa huati onana: Aji namidsa imadidsa ime, emene icajijaropi Diocca cacahuehehuaaji toja-jeranitohui. Pohua madihihuaajipi totabaccorara tani. Essire totabaccorara taniccapi nanidsa madinijine ssamo tani. ⁵¹Naraha ajijaro ima tiadenidsa huati onanijinepi madija mittamanapo-jarahicca. Ahuatora taporaha jidapana tiadenidsa huati onajaro. Madija ia motapi idsoqqe-jeranitohui. Naraha jicapojari assiredeni, ia mota idsoqqe-jerajaro essire huapima cacajiquimera-ridsanitohui.

⁵²Ajima nanitohui: Essirepi amadsati cacajiquimeranitohui, pina innoco pari najarossa nanitohui. Nidsa jeihei jicahicca jei jei nadsapa aji namidsa imadijarocca ima jicanitohui. Nadsapa jicapojarideni

nahatonimanahitohui, jicapomajarahijine. Nadsapa nahatonimanajari assiredeni, camittaquqiri inaccajaro essire huapima cacajiquimeranitohui. ⁵³ Ajijaro namicca essire totabaccorara taniccapi totabaccorarera taniccara tojanitohui. Essire huatiaha taniccapi huatiehera taniccara tojanitohui. ⁵⁴ Aji essire totabaccorara tanicca jica, huatiaha tanicca jica nadsapi totabaccorarera tanicca, huatiehera tanicca tojadsapi Dio Atti dsodo napojaro pajiranissa tanitohui: –Dsoqquehepi Diocca dacorehejine jicajaro, amossi najaro –nani nade. ⁵⁵ Dio Atti dsodo nani onihidsa naqui: –Nija Dsoqquehe ¿nejecohuaji ticca dacorehe? Nija Dsoqquehe ¿nejecohuaji ticomene? –nani nade Dio Atti dsodo nanidsa. ⁵⁶ Aji dsoqquehe comanipi imasiri. Najarojine madija paji idsoququerinica najidsohuedsa toquejenajaripaja. Diocca dosseniji tahideccapi madija imasiri inanamanani pohuadenidsa ahuato inanajaro. ⁵⁷ Nadsama ia Medsede Jesocristo pocca dacorehejine icca imasiri inanamosidsa idsoqqedsapi iadsa najidsohue nohueranitohui. Nema nadsapi Diodsa etidsedsa: –Jehe, epejeni. Tijine bica tani –ihinanajaro. ⁵⁸ Jehe ohuemecotedeni, tiadenidsa ohuati huana tani. Ima nema nadsapi dacoco tijiradsa nema tidsanapomanaji. Ia Medsedecca dossenijidsa tidsepedeni ijimanadsapi denima, denima tidisseramanani naji. Ajijaro imapi nahatoquqiri tiquinani: Ia Medsedsa tidsepedeni ijijaropi ponima jerani. Pohuajine tiadenidsa ima bicani tojanitohui.

Da naqquinaja imecotedenidsa

16 ¹ Jidapapi imecotedeni Diodsa jehe quinajari acco ticambaququimanahijine da naqquinaja tahimarini tiadenidsa huati onana. Pina aja dsama Carasiahuaji Diodsa quequeriquimana najaridenidsa huati onaridsapojarossa tinanamannijine bica tani. ² Najaroa aji semana tojapomanicca huada tahidecca domingo huajjiradsa da da taquimananijine titicajimana najaro arobeni motapi tetecahuaridsamana naji, ticcadeni daniji tohuapinijine. Ticcadeni tarabaida manaconi badsira tadsapi arobeni badsira tehe tecahuamanaji. Ticcadeni tarabaida manaconi motaradsapi arobeni motarehe tecahuamanaji. Ticcadeni dsiniro da taquimanapodsapi najorapods nani bacco onadsa odinijine. Nadsapi da naqquide tinajomana-jerani. ³ Titiqueriqui nanicca imecotedeni naco ticattejidsa-baququimanana, nani bacco onadsapi odsa panani Jerosarehuaji dosse onabaququihijine. Ticcadeni da naqquinaja Jerosarehuaji iaccamananijine ima teppe naqui pohuadenidsa da onadsa iaccamananijine. Najaro ima teppedsa Jerosarecca imecotedeni nahatoquqiri nahijine. ⁴ Ohua naqui nanihuaji occanitide, oqqejeranitide. Tiadenina paji. –Jehe ticcanijine bica tani –tiquinadsapi occanitohui. Pohuadeni naco ohuadsa jai tojahitohui.

Pablo pocca benehi najorapojari

⁵ Nidsa occa benehi occadsapi dsama Masedoniahuaji occaridsaponitohui. Masedonia-dsa qqui onaridsehe jicadsapi

nani Corintohuaji bacco onani-tohuhui. ⁶Nanihuaji bacco onadsapi tiadenidsa badsira tehe omadiccanitide. Denima omadiccana onadsapi dsadsajade onajicacanitide. Dsadsajade onajicadsapi dsama onihihuaji occanijine obiji acco ticamamanana, onajaro. ⁷Pina tiadeni qqui, oqqeéquima nanijinepi jipera onani. Tiadenidsa omadi naccanijinena tohuini onani. Ia Medsede jipa tadsapa nema onanitohui. ⁸Naraha aji odsa panani Epesodsa omadiccani, jodiodenicca ejete *Pentecostes onajicacanjine. ⁹Ajidsa ia Medsedecca dosseniji odsepe ijinijine tohuabanissa tajaro. Ima bicani tojanijine nahato onani: Madija Diodsa toquejenana canahitohui. Ahuajicca madija mota huapi taha ohuadsa jiperaqu岸ri naraha motana jipaqu岸ri najari. ¹⁰Nadsama Timoteo nahihuaji bacco tadsapa pohuadsa tetideni huanacqu岸ri nana, nahi huatidsehijine. Pohuapa ia Medsedecca dossenijidsa dsepe ijijari pina ohuassa najari. ¹¹Timecotedeni mota naco pohuadsa: –Ponima ticcajonajaro –quina-jarana. Pina acco ticamamanana, ohuadsa bacco najonahissa tahijine. Ohuapi ajidsa ohuemecotedeni tedseje pohuatohui imadiccani. ¹²Apolo naco imecotedeni tedseje tiadeni qquide nahi toccahijine huatide dissera onaraha toccade jipera tahi, najora-jaraccadsa. Nidsa najoradsana tiadeni qquide toccahitohui.

Pablocca ima jicanicca

¹³Tetideni huatodsaja jai tijaridsanissataji. Jesocristocca imadsa dissera tinadsa pocca imadsara jehe tidsanapomanaji. Cappineraqu岸ri

tiquinadsa Diocca dacorehema dacoco tijiraji. ¹⁴Ticcadeni tohuati huanehema, huatidsehema tidsepedeni ihijiridsamana naji.

¹⁵Ohuemecotedeni, Estepanacca ima nahatoqu岸ri tiquinani. Ticcadeni dsama Acaiahuaji Jesocristo tahimari icassiejeranijinecca mari ocana-baquipodsapa Estepanana pocca madijama Jesocristodsaja jehe quinapjaride. Dsotodena madija ohuahadeni Jesocristodsaja toquejenaridsajaride. Estepanapa pocca madijama imecotedeni Jesocristodsaja jehe quinajari bijideni accode disseraqu岸ri najaride. ¹⁶Nadsama tiadenipi Estepanadeni attidenidsa, aja imecotedeni pina Estepanassa quinajari attidenidsa naqui iboraqu岸ri tiquinana, onajaro. Aja imecotedeni acco icamabaqu岸ri-manajarideni, aja Dio Atti mamarideni, najarideni huapima attidenidsa naqui iboraqu岸ri tiquinana.

¹⁷Tiadenipi huajiji tinajarojine ohua acco ticamamananijine ssamo tani. Naraha Estepana, Fortonato, Acaico quinajarideni ohuahujaji bacco quina dsapa ohuatidsejaro. ¹⁸Pohuadenipa Dio Attidsa obodi acco icamamanajarojine ohuatidsejarode. Tiadeni naco tiadeni tonahatidse-baqu岸ri-manajari. Pohuadenidsa bicaqu岸ri tiquinaji. Madija ohuahadeni pina najaridenissa quinajaridenidsa naqui tetetidsemana naji. –Pohuadenipa bicaqu岸ri nahi –titiquina nana.

Diodsa quequeriquimana najarideni nija naridsamanajari

¹⁹Nadsama aja dsama Asiahuajicca Diodsa quequeriquimana nahihuajicca huapimapa tiadenidsa nija quinajari. Aquira pocca amoneje Prisira tadsajani, poccadeni odsadsa

quequeriquimana najarideni naco
ia Medsede onima nija quinajari.

²⁰ Imecotedeni huapima naco nija
quinajari. Tiadeni naqui titesse
jehe quinajarideni tedseje bacco
ticaniredsapi nija tiquinadsa dama,
ticahuajacossa titiquina naji, onajaro.

²¹ Aji ohua Pablo naqui tiadenidsa
nija onajaro. Ajijaro ima jicaniccapi
ohua odsepedsa dsodo onajaro.

²² Ia Medsede Jesocristodsa
jiperaquiri najaridenipa apaja, Dio
inajidsobaququina. ¡Nija, ia Medsede
ticcaniji! onajaro.

²³ Jehe, ia Medsede Jesocristopa
tiadenidsa ima bicani inanana,
onajaro. ²⁴ Jesocristocca tohuati
huanehema tiadeni huapimadsa
ohuati huana tani. Pajissa nema
nana. Epejeni.